

# Okunnyonnyola Emirembe Omusanvu Egy' Ekkanisa

## Essuula Eyoomunaana Omulembe Gw'ekkanisa Ya Firaderufiya

Okubikkulirwa 3:7-13

"Era eri Malayika ow'ekkanisa ey'omu Firaderufiya wandiika nti bw'Ati bw'Ayogera oyo Omutukuvu, ow'amazima, Alina ekisumuluzo kya Dawudi. Aggulawo, so tewali muntu aggalawo, Aggalawo, so tewali muntu aggulawo.

*Nti Mmanyi ebikolwa byo (laba, Nnateeka mu maaso go oluggi olugguddwa omuntu yenna Iw'atayinza kuggalawo) ng'olina amaanyi matono, n'okwata Ekigambo kyange, so teweegaana Linnya Lyange.*

*Laba, ng'abo ab'omu kkunngaaniro lya Setaani abeeyita Abayudaaya so nga si bo, naye balimba; laba Ndibaleeta okujja okusinza mu maaso g'ebigere byo era Ndibamanyisa nga Nnakwagala.*

*Kubanga weekuma Ekigambo ky'okugumiikiriza Kwange, era Nange Ndikukuuma obutayingira mu kiseera eky'okukemebwa ekigenda okujja ku nsi zonna, okukema abo abatuula ku nsi. Nzija mangu: nyweza ky'olina, omuntu yenna aleme okutwala engule yo.*

*Awangula Ndimufuula empagi mu yeekaalu ya Katonda Wange, so talifuluma nate bweru, Nange Ndiwandiika ku ye Erinnya lya Katonda Wange, n'erinnya ly'ekibuga kya Katonda Wange, Yerusaalemi ekiggya ekikka okuva mu ggulu eri Katonda Wange, n'Erinnya Lyange eriggya.*

*Alina okutu awulire Omwoyo ky'Agamba ekkanisa."*

### Firaderufiya

Firaderufiya kyali mmayiro 75 mu bukiika obwa ddyo obw'ekibuga Saadi. Ky'ekibuga ekyali kiddirira obunene mu Ludiya. Kyazimbibwa ku nsozi eziwerako mu ssaza eryali ettutumufu mu kulima ebibala omusogolwa omwenge. Ku ssente zaalyo kwalingako omutwe gwa Bacchus n'ekifaananyi kya Baccante (kabona omukazi owa Bacchus). Mu bantu abaalimu mwalimu Abayudaaya, Abakulisitaayo abaasibuka mu Bayudaaya n'abayigirizwa abaava mu bukaafiri. Ekibuga kyatawaanyizibwa musisi emirundi mingi, ate nga kye kyasinga okuwangaala ku bibuga omusanvu ebiri mu Okubikkulirwa. Ddala ekibuga kikyaliwo nga kiyitibwa erinnya mu lulimi Iwa Turkey Alasehir, oba Ekibuga kya Katonda.

Okuweesa ssente kulaga nti Bacchus ye yali katonda w'ekibuga kino. Bacchus ly'erimu ne Ninus oba Nimuloodi. Y'oyo "akungubagirwa" wadde abasinga obungi ku ffe tumutwala okuba nti akwatagana n'ebiduula n'obutamiivu.

Kino nga kituleetera omusana mu mitima gyaffe! Essente yiino eriko katonda ku ludda olumu ate nga ku ludda olulala kuliko kabona oba nnabbi omukazi. Kati kasuka ssente mu bbanga. Kirina amakulu ngeri ki gy'egwamu wansi? Nedda ssebo, ssente eyo y'emu. Eyo y'eddiini y'Ekiruumi eya Yesu ne Malyamu.

Wabula tetulowooza ku Rooma yokka. Nedda, omwenzi ow'ekitalo tali yekka. Nedda n'akatono; kubanga, okuyita mu bwenzi bwe azadde abaana. Bawala be kaakano nabo ze ssente ezaaweesebwa mu ngeri emu nga ye. Ku ludda olumu balinako okusinza Yesu ate ku ludda olulala kuliko kabona nnabbi omukazi era awandiika ebikwate bye enjigiriza n'ebiragiro n'abiguza abantu ng'afunamu ssente era ng'akiggumiza nti ye y'alina omusana omutuufu gwokka.

Ddala nga kya Iwatu nti omulembe guno gulimu nnyo ssente ezaaweesebwa. Kubanga abaana (ab'obuwala) ne nnyaabwe bona bagula ekkubo libatwale mu ggulu. Ssente ze baguzisa so si musaayi. Amaanyi agabatambuza okugenda mu maaso ze ssente so si Omwoyo. Katonda w'ensi eno (mamona) abazibye amaaso.

Wabula emirimu gyabwe egy'okutta ginaatera okukoma, kubanga guno gwe Mulembe Omwoyo mwayogerera waggulu, "Laba, Nzija mangu." Era, jjangu mangu, Mukama Yesu!

### **Omulembe**

Omulembe gw'ekkanisa ya Firaderufiya gwaliwo wakati w'omwaka 1750 okutuuka nga 1906. Omulembe guno, okusinziira ku makulu g'erinnya ly'ekibuga guyitiddwa omulembe gw'okwagalana kw'ab'oluganda, nga Firaderufiya bwe kitegeesa, "okwagala kw'ab'oluganda."

### **Omubaka**

Awatali kubuuusabuusa omubaka eri omulembe guno yali John Wesley. Yazaalibwa mu kifo ekiyitibwa Epworth, nga 17, June 1703, era yali omu ku baana ekkumi n'omwenda aba Samuel ne Susana Wesley. Kitaawe yalina obuvunaanyizibwa mu kkanisa y'omu Bungereza; naye kirabika nti okukyuka kwa John mu by'eddiini okusinga kwasigamizibwa ku by'okulabirako mu bulamu bwa nnyina okusinga ku ddiini ya kitaawe. John yali tuyizi mugezi. Bwe yali mu Oxford ye ne Charles beegatta ku kibiina abeemanyiiza okusinza mu mwoyo ku musingi ogw'okuteeka amazima mu nkola okusinga okweyambisa enjigiriza yaabwe. Baateekawo enkola ey'ebikolwa ebirungi, nga okugabira abaavu, okukyalira abalwadde n'abasibe. Olwa kino baayitibwa Bamethodist, n'amannya amalala agajereegerera. Kati John yali ajjudde okwolesebwa kw'obwetaavu bw'eddiini eri abantu abaagenda mu America (mu ssaza ly'e Georgia) ng'abaminsane eri Abayindi. Mu lugendo lwe yakizuula nti abasaabaze abasinga obungi abaali mu mmeeri baali ab'eggwanga eriyitibwa Moravia. Yasikirizibwa nnyo olw'obuwombeefu bwabwe, eddembe n'obuvumu bye baalina mu mbeera zonna. Newankubadde yakola nnyo ne yeerekereza n'okwegaana eby'ensi bambi byonna bye yakola mu Georgia byafa busa. Yaddayo mu Bungereza ng'akaaba; "Nagenda mu America kukyusa Bayindi naye oh! Ani alinkyusa nze?"

Ng'azzeeyo e London nate yasanga ba Moravians. Peter Boehler ye yamulaga ekkubo ly'obulokozi. Yazaalirwa ddala omulundi ogwokubiri ekyatabula era ne kinyiriza ddala muganda we Charles, ataasobola kutegeera muntu wa mwoyo nga John okwogera nti emabegako teyali mutereevu mu maaso ga Katonda. Naye ate, waayitawo ebbanga ttono, Charles naye n'alokoka olw'ekisa.

Kati Wesley yatandika okubuulira enjiri ku bituuti byo mu London okusooka gye yasabolanga okutuuka; naye amangu ddala baamugobayo. Mu kiseera kino mukwano gwe, George Whitefield, we yamuwigirira n'amuyita amuyambeko okubuulira mu bifo omwali enkumi z'abantu abaali bawuliriza Ekigambo. Okusooka Wesley yali takkiriza nti ateequa okubuulira ebweru so si mu nda mu bizimbe, naye bwe yalaba agabiina n'enjeri Enjiri gye yali ekolamu mu maanyi yakyukira ddala n'adda ku mbuulira eyo ey'ebweru.

Omulumu gwagaziyira ddala n'atandika n'okutuma abagoberezi babuulire Ekigambo. Kino kyafaananako nga Pentekoote Omwoyo mwe Yayimusiza abantu n'amaanyi okubuulira n'okuyigiriza Ekigambo kumpi okukeesa obudde.

Omulumu gwe gwawakanyizibwa ne ssekukwakanya yenna naye Katonda Yabeera naye. Emirimu gy'Omwoyo gyayolesebwa nnyo era mwoyo w'okulumiriza yawkata abantu n'abateekamu amaanyi ne bagwanga ku ttaka nga bakaaba n'okunyolwa olw'ebibi byabwe.

Wesley yalabika nga musajja wa maanyi. Yeeyogerako nti teyajjukirako nga yaddirirako oba yakendeerako mu mwoyo wadde eddakiika 15 okuva lwe yazaalibwa. Okwebaka kwe teyasussanga mu ssaawa mukaaga olunaku; yazuukukanga n'abuulira ng'atandika ku ssaawa 11 ez'oku makya buli lunaku mu buweereza bwe; n'abuulira okutuusa emirundi ena kale mu mwaka omulamba n'aweza amasomo ga mirundi 800.

Yatambula emitwalo n'emitwalo gya mmayiro okufaanana ng'abawereza be abaasaasaanya Enjiri ebule n'ebweya. Mu butuufu Wesley yatambulanga mmayiro 4,500 buli mwaka ng'akozesa mbalaasi.

Yali akkiriza mu maanyi ga Katonda era yasabiranga abalwadde mu kukkiriza okw'ekitalo era n'ebibala ebyewuuniya ne byeyoleka.

Enkunngaana ze nnyingi zaalaba okweyoleka kw'ebirabo by' Omwoyo.

Wesley yali tasanyukira bibiina bitegeke. Be yakolagananga nabo baalinanga ekibiina

ekyayitbwanga "United Society" nga bano, "be basajja abaalina ekifaananyi, nga banoonya amaanyi g'obutuukirivu nga beegasse okusobola okusabira awamu okufuna Ekigambo ky'okubazzaamu amaanyi n'okukunngaanira awamu mu kwagalana basobole okuyambagana okukola obulokozi bwabwe." Ekisaanyizo kyokka ekyali kyetaagisa okusobola okuyingira kyali nti "oyo eyalina okwagala okudduka obusungu obujja, n'okulokoka okuva mu bibi." Ekiseera nga bwe kyeyongerayo baakola amateeka amakakali ag'okweyambisa mu mpisa n'olw'obulungi bw'emmeeme zaabwe Wesley yalaba nti ng'afudde omulimu gwali gwa kufuulibwa kibiina (organisation) Omwoyo wa Katonda Abaleke nga bafudde. Lumu yayogera nti yali teyeeraliikirira kya linnya lya Methodist kubavaako wabula Omwoyo wa Katonda okugenda.

Mu bulamu bwe bwonna yandisobodde okufuna obugagga obungi naye teyakikola. Enjogera ye eyamusanyusanga ennyo ng'ayogera ku bya ssente yagambanga; "Funannyingi nga bwe kisoboka, tereka nnyingi nga bw'osobola era gaba nnyingi nga bw'osobola." Nga kyandyewuunyisizza Wesley singa kisoboka okudda n'alaba amadiini agalina erinnya lya Methodist leero! Bagagga —bagagga ffugge. Wabula amaanyi n'obulamu bwa John Wesley tebabulina.

N'ekirala kiteekwa okukoonebwako nti Wesley teyayagala n'akatono okuzimba omulimu ku ddiini (enkola ey'abantu) oba ku musingi ogw'akabiina (Sectarian). Wadde mu nzikiriza ze yali akkiriza mu Arminia, teyayagala kweyawula ku ba luganda olw'enjgiriza. Yayigirizibwa kinene mu kusoma ekitabo kya Yakobo: obulamu obutakoma yabuteeka mu kukkiriza n'ebikolwa, oba okutambuza obulamu okusinga okukkiriza ekikwate oba ekiwandiiko ky'enjgiriza. John Wesley yafa nga wa myaka 88 ng'aweerezza Katonda ebbanga abantu abangi lye batayinza kulowooza nti basobola.

### **Okulamusa**

Okubikkulirwa 3:7,

*"Era eri malayika ow'ekkanisa ey'omu Firaderufiya wandiika nti Bw'Ati bw'Ayogera Oyo omutukuvu, ow'amazima, Alina ekisumuluzo kya Dawudi, Aggulawo, so tewali muntu aliggalawo, Aggalawo, so tewali muntu aggulawo."*

Oh, ebigambo ebyo nga birungi! Ng'eddoboozi lyabyo lya maanyi! Nga bizzaamu amaanyi okulowooza nti emitwe egyo gyonna gikozesebwa ku muntu omu! Ani ayinza okwannganga ne yeeyogerako bw'atyo okuggyako Yesu Kristo, Mukama ow'Ekitiibwa? Nkakasa ekisumuluzo ky'okuvvuunulira ddala buli linnya ku manya gano agannyonyola kye litegeeza kisangibwa mu lunyiriri olw'omwenda,

*"Laba Nja kubafula abo ab'ekkunngaaniro lya setaani, abeeyita Abayudaaya ate nga si bo naye nga balimba; Ndibaleeta okujja okusinza mu maaso g'ebigere byo, bamanye nga Nkwagadde."*

Nngamba nti olunyiriri luno kye kisumuluzo kuba lukolagana n'Abayudaaya olubeerera abeeyita abaana ba Katonda awatali balala bona. Baakomerera Mukama Yesu Kristo ne bamutta. Eki kyabwe kino kyabateesaako omusaayi gwabwe ku mitwe gyabwe okumala ebyasa. Olw'okuba baagaana Yesu okuba Masiya, so nga ddala kye yali. Bo tebaamubala nti y'Oyo ow'okujja, oba Omwana wa Dawudi, wabula Beruzebuuli, oba omwonoonyi asaanidde okuzikirizibwa obuzikirizibwa. Naye si bwe kiri. Yali Emmanweri ddala, Katonda Eyayolesewa mu mubiri. Ddala ye Masiya. Mu butuufu, Yali nga kaakano bwe Yeeraga. Y'Oyo, ye YESU Y'OMU OYO — Yesu Kristo aba bumu jjo, leero n'emirembe gyonna. Oyo Omutukuvu Ali wakati mu bikondo by'ettabaaza y'omu Yesu Yennyini Eyatambilira ku mbalama z'enyanja ey'e Galiraaya, Eyawonya abalwadde, Eyazuukiza abafu, oyo Eyattibwa wadde waaliwo obukakafu obw'enkukunala. Naye Yazuukira nate, era Atudde ku mukono ogwa ddyo ogw'ow'ekitiibwa waggulu.

Abayudaaya tebaamuyita mutukuvu mu biseera ebyo. Ne leero tebamuyita mutukuvu. Naye ye MUTUKUVU.

Zabbuli 16:10;

*"Kubanga tolireka mmeeme Yange mu magombe; so toliganya OMUTUKUVU WO okulaba okuvunda."*

Obutuukirivu bwabwe baabunoonyeza mu mateeka era ne bibalema, kubanga tewali mubiri guyinza kutukuzibwa lwa mateeka. Okuyita mu mateeka tewali muntu ayinza kutukuzibwa. Obutukuvu bwa Mukama.

Abakkolinso 1:30,

"Naye ku bw'YOY mmwe muli mu Kristo Yesu, eyafuuka amagezi gye tuli okuva eri

Katonda era n'obutuukirivu, n'okutukuzibwa, n'okununulibwa;"

II Abakkolinso 5:21b,

*"Ffe tulyoke tufuuke obutuukirivu bwa Katonda mu Ye."*

Yalina kuba Kristo, oba si ekyo kuzikirira, era baazikirira kubanga baamugaana.

Era abantu b'emirembe egoy okufaanana nga leero baali bakola ensobi y'emu. Ng'Abayudaaya bwe beewogoma mu kusinza okw'engeri y'omu kkunngaaniro, bwe kityo ne mu mulembe gwa Firaderufiya baali beewogoma mu kkanisa. Ekikulu si kwe kwegatta kkanisa. Obulamu tebuli mu kkanisa. Obulamu buli mu Kristo. "Era okutegeeza kwe kuno nti Katonda Yatuwa obulamu obutaggwaawo, era obulamu obwo buli mu Mwana We. Alina Omwana alina Obulamu era oyo atalina Mwana wa Katonda talina bulamu." Omuntu atukuzibwa na Mwoyo. Omwyo w'Obutuukirivu eyazuukiza Yesu okuva mu bafu gwe gutubeeramu ffe n'atufuula abatukuvu n'obutuukirivu Bwe.

Wuuyo Ayimiridde, OYO OMUTUUKIRIVU. Era tuliyimirira naye nga twambadde obutuukirivu Bwe, nga tutukudde n'obutukuvu Bwe.

Kati guno gwe mulembe ogw'omukaaga. Mu maaso ga Katonda, ekiseera kinaatera okuggwaayo. Anaatera okudda. Omulanga gunaatera okufuluma ng'Ajja,

*"Era omugwagwa abeere ng'akyali mugwagwa; n'omutuukirivu abeere ng'akyali mutuukirivu; n'omutukuvu abe ng'akyali mutukuvu."*

Okubikkulirwa 22:11b.

Oh, ndi musanyufu nnyo nti obutukuvu bwange si bwange. Ndi musanyufu kuba ndi mu Kristo, n'ebimwogerako byonna eby'ekitalo, eby'obutuukirivu binteeddwamu. Lubeerera Katonda Aweebwe omukisa!

*"Ebintu bino Oyo Omantuufu y'Abyogera."* Kati ekigambo kino, "omantuufu," kigambo kya kitalo nnyo. Amakulu gaakyo tegali awo nti kye kikontana ne kikyamu. Kyoleka Okutegeerera ddala okw'ekirowoozo kyonna mu bujuvu bwakyo.

Eky'okulabirako tujjukira nti Yesu Yagamba mu Yokaana 6:32,

*"Musa si ye yabawa emmere eyava mu ggulu naye Kitange Ye Yabawa emmere ey'amazima eva mu ggulu."*

Yokaana 15 :1,

*"Nze muzabbibu ogw'amazima ."*

Abaebbulaniya 9:24,

*"Kubanga Kristo teyayingira mu kifo ekitukuvu ekyakolebwa n'emikono, ekyafaanana ng'ekyo eky'amazima; naye mu ggulu mwennyini, okulabika kaakano mu maaso ga Katonda ku lwaffe:"*

I Yokaana 2:8,

*"Nate mbawandiikira ekiragiro ekiggya ekigambo eky'amazima mu Ye ne mu mmwe; kubanga ekizikiza kiggwaawo, n'omusana ogw'amazima kaakano gwaka."*

Ekigambo kino, okuva Iwe kyolekera ddala, okumanya okutuukiridde nga ekyo kikontana n'Okumanya okw'Ekitundu nga kirabika mu nnyiriri zino, kaakano tusobola okutegeera okusinga bwe twali tutegedde enjawulo eziriwo wakati w'okufaananya n'obutafaananya, wakati w'ebintu ebya nnamaddala n'ebisiikirize. Kati twala eky'okulabirako eky'emmaanu okuva mu Ggulu. Katonda Yawereza emmere ya bamalayika okuva mu ggulu ng'Agiwa Abayisiraeri. Naye emmere eyo teyakkusa. Yali nnungi okumala olunaku lumu. Abo abaagiryenjala yabaluma nnyo olunaku olwaddirira. Bwe yalekebwangawo yayonoonekanga. Naye Yesu y'emmere EY'AMAZIMA okuva mu ggulu, nga yo emmaanu kyali kifaananyi bufaananyi (kabonero). Era omuntu yenna bw'alya ku MMERE eyo eyava mu Ggulu talirumwa njala nate. Teyeetaaga kuddayo kulya nate. Olwalyanga, yafunanga obulamu obutaggwaawo. Wano ddala waaliwo obwa NNAMADDALA. Tewakyetaagisa kisiikirize. Tewakyetaagisa bulokozi bwa kitundu. OBULAMBA bwakyo buubuno. Nga Yesu bw'Atali kitundu kya Katonda; Ye ye Katonda.

Tewali yali asobola kuwakana nti Isiraeri yalina omusana. Be bantu bokka abaalina omusana ng'eggwanga. Kyali nga Misiri bwe yali mu nzikiza ng'omuntu asobola n'okugiwulira. Naye mu maka g'Abayisiraeri mwalimu omusana. Naye kati omusana ogw'amazima guzze. Omusana gw'ensi ye Yesu. Musa ne bannabbi baaleeta omusana nga bakozesa Ebyawandiikibwa ebikwata ku Masiya. N'olw'ekyo Isiraeri yalina omusana. Naye kaakano okutuukirira kw'omusana kuzze era, olwo Ekigambo ekyali kimasamasa

obumasamasa kiviiriddeyo ddala mu butangaavu bwa Katonda obwoleseddwa mu bantu Be. Ng'empagi y'omuliro bwe yamulisanga ekiro, era ekyo kyali kyamagero, kati omusana n'obulamu byayolesebwa mu bujjuvu mu Bulamba bwa Katonda ng'omubiri bwe guli.

Isiraeri yaddiranga ente enduusi emmyufu n'egisaddaakira ku woolutaali olw'okuggyibwako ebibi. Okumala omwaka mulamba ng'ebibi by'omwonoonyi byabikkibwako. Wabula okubikkibwako okwo tekwaggyangawo kuyaayaanira kukola bibi. Tekyalinga kiweebwayo kituukiride. Kyali kisiikirize okutuusa ekyo ekya nnamaddala bwe kyajja. Kale buli mwaka omuntu yawangayo Ssaddaaka buli mwaka n'akomawo kubanga yalina okuyaayaana kwe kumu eri okwonoona. Obulamu bw'ensolo bwasangulawo ebibi bye, naye nga bwe gwalinga omusaayi gw'ensolo ogwayiikanga tegwasabolanga ng'era obulamu bw'ensolo bwe bwaweebwayo bwali tebusobola kukomawo ku muntu. Ne bwe bwandikomyewo era tebwandikoze. Naye Kristo, ssaddaaka eya namaddala bwe yaweebwayo, n'omusaayi Gwe ne guyika, olwo obulamu obwali mu Kristo ne bukomawo ku mwonoonyi eyeenena era n'obulamu obwo bwe bwali obulamu bwa Kristo obutuukiride, okutaali bbala, olwo ng'omwonoonyi asobola okugenda ng'alina eddembe kubanga yali takyalina kuyaayaana eri ekibi. Obulamu bwa Kristo bwali bukomyewo ku ye.

Ekyo ge makulu agali mu Baruumi 8:2,

*"Kubanga etteeka ery'Omwoyo gw'obulamu mu Kristo Yesu Iyanfuula ow'eddembe okunzija mu tteeka ly'ekibi n'ery'okufa."*

Naye edda, Abayudaaya mu biseera bya Yesu tebaayagala kukkiriza ssaddaaka eyo. Omusaayi gw'ente n'embuzi tegulina kye gwatuukiriza. Okusooka y'enkola ya Katonda gye Yali Ataddewo. Naye kaakano Kristo nga bwe Yalabikira mu mubiri, era okuyita mu kuiwi omusaayi Gwe Yaggyawo ekibi era okwewaayo okwo kutufudde abatuukirivu. Abayudaaya nga tebayinza kukkiriza oba ekyo okukitwala. Naye ate gwali gutya ku mulembe gwa Firaderufiya, n'emirembe emirala? Ekya nnamaddala kino mu Kristo baakkiriza? Nedda ssebo. Wadde Martin Luther yaleeta amazima g'okuggyibwako omusango, Ekereziya y'Ekirumi, n'abo bwe bafaananya enkola ab'ekkanisa ya Orthodox, bo baagenda mu maaso n'okwesiba ku bikolwa.

Ebikolwa birungi, wabula tebikulokola. Tebikuula mutuukirivu. Ekikulu kiri Kristo oba si ekyo olina kuzikirira. Ate era wadde tekiri Kristo AWAMU n'ebikolwa. Kristo Yekka. Omulembe guno gwatandika emyaka nya ba Arminia abatakkiririza mu Kristo okuba nti wa NNAMADDALA. Teyimba (enkola) "Tewali kirala okuggyako omusaayi gwa Yesu," kubanga yo eyimba "Tewali kirala okuggyako omusaayi AWAMU NE empisa zange." Kati nzikiririza mu mpisa ennungi. Bw'oba oli mulokole ojja kukola bya butuukirivu. Ekyo twakiyiseemu dda. Naye kati ka mbabuulire, obulokozi tebuli YESU n'OKWONGERAKO. BULI YESU YEKKA. OBULOKOZI BWA MUKAMA. Okuva we butandikira okutuuka we bukoma bwonna KATONDA. Leka Obulamu Bwe bube mu nze. Leka omusaayi Gwe gwe guba gunnongoosa. Omwoyo Gwe guba gunzijuza. Ekigambo Kye kye kiba kibeera mu mutima gwange ne mu kamwa kange. Leka emiggo Gye gye giba gimponya. Ka Abeere Yesu era Yesu Yekka. So si bikolwa bya butuukirivu bye nkoze. Nedda ssebo. Kristo bwe bulamu bwange. Amiina.

Mpulira muli nnyinza okugendera ddala mu maaso n'amazima gano, naye nja kubongerayo ekirowoozo kimu. Kiri mu luyimba olwo olw'ekitalo olwawandiikibwa A. B. Simpson.

"Lumu gwali mukisa,

Kaakano Mukama.

Lumu kwali kukiwlira munda

Kaakano Kigambo Kye.

Lumu nneetaaga EKirabo Kye,

Kaakano y'AkirinaLumu nnanoonya okuwonyezebwa

Kaakano Ye Yekka

Lubeerera Ye byonna mu byonna,

Yesu gwe nnaayimba,Buli kintu mu Yesu.

Era Yesu Ye byonna.

Mu bulamu buno temuli kintu, wadde kirabika nga kimatiza, wadde kirabika

ng'ekirungi, naye ojja kusanga omuwendo gw'ebintu byonna ebituukiridde nga guli mu Kristo. Ye awatali byonna biseebengerera ne bifuuka butaliimu.

*"Oyo Alina ekisumuluzo kya Dawudi."* Enjogera eno ennungi egoberera era eva mu eno esooka eyo eryoke eddeko, "Oyo ow'amazima." — Kristo, Okumanya Okutuukiridde, ng'ageraageranyiziddwa mu kitundu eky'okutegeera. Kiikino wano. Musa yali omu ku bannabbi ba Katonda, naye Yesu (okufaanana nga Musa) ye YALI Nabbi wa Katonda. Dawudi (omusajja ow'omutima ng'ogwa Katonda) yali kabaka wa Isiraeri, naye Yesu ye Dawudi Akirako, Kabaka wa Bakabaka era Mukama wa Bakama, Katonda, Katonda Yennyini. Dawudi yazaalibwa mu kika kya Yuda omutaava bakabona, ate nga ye yalya ku migiati egy'okulaga egiterekerwa bakabona bokka. Ye yali omulwanyi ow'ekitalo eyawangulanga abalabe, ng'atebenkeza abantu, yatuula nga kabaka ku nnamulondo. Yali nnabbi. Yali kifaananyi kya Kristo eky'ekitalo.

Mu Isaaya 22:22 kigamba,

*"N'ekisumuluzo ky'ennyumba ya Dawudi ndikiteeka ku kibegabega Kye; era Aliggulawo so tewaliba aggalawo; era Aliggalawo so tewaliba aliggulawo."*

Omwoyo Akozesa ekintu kino ky'Ajja mu Ndagaano Enkadde nga kikwata ku Yesu Kristo Mukama n'obuweereza Bwe mu kkanisa. Amakulu agaalagibwa ekisumuluzo kya Dawudi mu biseera ebyo kisiikirize busiikirize, naye kaakano kituukiriziddwa mu Yesu Ayimiridde wakati mu bikondo by'ettabaaza. Kikwataganako ku Mukama waffe nga AMAZE okuzuukira so si mu buweereza Bwe ku nsi. Naye ekisumuluzo kino kiraga makulu ki? Eky'okuddamu kiri mu KIFO awali ekisumuluzo. TEKIRI mu mukono gwe. Takyambadde mu bulago Bwe. Tekiteekeddwa mu mikono gy'abantu balala, kuba olunyiriri terwandigambye nti YE YEKKA AKOZESA EKISUMULUZO EKYO — KUBANGA YE YEKKA AGGULAWO N'AGGALAWO ERA TEWALI MUNTU alina buyinza okuggyako Yesu Kristo Yennyini. Ekyo si bwe kiri? Naye ekisumuluzo kiri ludda wa? KIRI KU KIBEGABEGA KYE. Naye EKIBEGABEGA kikwataganako kitya?

Soma Isaaya 9:6,

*"N'obufizi kunaabanga ku kibegabega Kye."*

Naye kino kitegeeza ki? Eky'okuddamu kiikino. Enjogera egamba, "obufizi ku kibegabega Kye" eva ku mukolo ogw'embaga mu Buvanjuba. Omugole omukazi bw'aba aweereddwayo eri bba aggyako akatimba n'akateeka ku bibegabega bya bba amakulu nti tamufuga bufizi (omugole omusajja) — nti eddembe lye (rights) lyonna alitadde ku ye — nti ye ye mutwe nti era ye yeetisse obuvunaanyizibwa obw'okumulabirira era YE YEKKA — TEWALI MULALA — TEWALI BUYINZA BULALA — TEWALI MULALA AMULINAKO DDEMBE NA BUVUNAANYIZIBWA. Era ekyo, abaagalwa, kye KISUMULUZO kya Dawudi. Katonda nga bw'Ali ow'oku ntikko Atalemwa, Yamanyirawo mu Butukuvu Bwe ani ddala alibeera mu mugole We. Yamulonda (omugole). Omugole si ye yalonda Katonda. Ye (Katonda) yamuyita. Teyajja (omugole) ku lulwe. Yamufiirira. Yamunaaza mu musaayi Gwe. Yamusasulira omuwendo. Wuwe era wuwe yekka. Omugole yeeweerayo ddala gy'Ali era naye (Yesu) Akkiriza obuvunaanyizibwa. Ye gwe mutwe gwe, kubanga Kristo ye mutwe gw'ekkanisa. Nga Saala bwe yayita Ibulayimu, mukama, n'omugole naye musanyufu okuba nti ye Mukama we. Ayogera n'amugondera kubanga eryo ly'essanyu lye.

Naye amazima gano abantu bagagondedde? Batadde ekitiibwa mu Muntu ono Yekka Alina obuyinza obujjuvu obw'oku ntikko ku kkanisa Ye? Nngamba, "NEDDA." Kubanga mu buli mulembe ekkanisa ebadde efugibwa amadaala g'obufizi — obwakabona — ensikirano y'obutume — nga baggalawo oluggi lw'okusaasira n'ekisa eri abo be baba balonze, ne mu kifo ky'okutwala okwagala n'obuvunaanyizibwa eby'ekkanisa ekozesezza obukambwe obw'ekisolosolo n'emutaagula n'emuzikiriza. Bakabona bo baatambiliranga mu bulamu obwa waggulu nga bo abaavu badaagira mu kuvumibwa. Era tewali mulembe na gumu gwakola kya njawulo. Buli gumu gwasiba ku kibiina (organization) gavumenti ne gugiteeka ku bantu era ekkanisa ne gugiwaayo eri gavumenti eyo. Abantu bwe bennganga okusituka, baatulugunyizibwa n'obukambwe oba okugoferwa ebweru. Buli kibiina kya ddiini kirina omwoyo gwe gumu. Buli ddiini eguggubira nti erina ekisumuluzo ku bufizi bw'ekkanisa. Buli ddiini egamba nti eggulawo oluggi. Naye ekyo si kituufu. Ye Yesu era Yesu Yekka. Ategeka abantu mu mubiri. Abawa amaanyi mu buweereza bwabwe. Ebirabo Abimuteera awo. Amulabirira era Amukulembira. Ye (omugole oba ekkanisa) kye kintu Kye eky'obwanannyini era talina mulala okuggyako ye.

Nga guli wala nnyo (mwawufu) omulembe gw'ekkanisa eno gwe tulimu okuva ku mazima. Era lumu gye bujjako abantu bano abeefuula okuba nti be boogerera ekkanisa bajja kuvirayo mu nkola ya "ecumenical" (okutabagana kw'amadiini mu nsi yonna) bateekewo omulabe wa Kristo ng'omukulembeze w'ekibiina kyabwe ekisuula Mukama era tumusanga bweru wa kkanisa ng'Agamba nti,

*"Laba Nnyimiridde ku lugggi Nkonkona, omuntu yenna bw'awulira eddoboazi Lyange n'aggulawo, Nja kuyingira, era Nnaalya naye, naye anaalya Nange."*

Okubikkulirwa 3:20.

Naye ka njogere kino. Mukama waffe tawangulwanga. Abantu boogera mbu baggulawo oluggi eri Katonda era ne baluggala naye balimba. Abo bona Kitange be Yamuwa bajja kujja gy'Ali era buli ajja gy'Ali Talimugohera bweru, tagenda kubulwako N'OMU. Yokaana 6:37-39. Era omulonde oyo asembayo mu mubiri gwa Kristo bw'aliyingira olwo Mukawa waffe Alirabika.

Ekisumuluzo kya Dawudi. Dawudi si ye yali kabaka wa Isiraeri — Isiraeri yonna? Era Yesu si Mwana wa Dawudi okusinziira ku kino nti Alituula mu nnamulondo ya Dawudi mu bufuzi obw'emyaka olukumi Afuge obusika Bwe? Ddala ddala. N'olw'ekyo ekisumuluzo kya Dawudi kiraga nti Yesu y'Alireeta obufuzi obw'emyaka olukumi. Oyo Alina ebisumuluzo by'okufa ne ggeyeena Alizuukiza ababe bagabane naye mu bufuzi Bwe mu butuukirivu ku nsi.

Nga kya kitalo okuba nti Mukama waffe Alina eby'okuddamu byonna! Ddala mu Ye ebisuubizo bya Katonda byonna mwe bituukirizibwa. Mu butuufu okubeera mu Ye tulisikira ekkyo ky'Atugulidde.

Yee, wuuyo Ayimiridde, Mukama ow'Kitaffa. Lumu yali nga Kitaffe, Yali Yeetooloddwa bamalayika, bamalayika abakulu, bakerubi ne basseraafi n'eggye lyonna ery'omu ggulu nga lyogerera waggulu nti, "Omutukuvu, Omutukuvu, Omutukuvu, ye Mukama Katonda ow'Egye." Bwe butyo bwe bwali obutuukirivu Bwe nga tewali muntu asobola kumutuukirira. Naye kati tumulaba mu kkanisa ng'Agabana naffe obutukuvu Bwe okutuusa mu Ye bwe tufuuse obutuukirivu bwennyini obwa Katonda. Yee era Wuuyo Ayimiridde awo, "Yesu Atalina ky'Abulako, ... Eddanga ly'omu Kiwonvu, Emmunyeeny'e'oku Nkya Eyakaayakana, Asingayo mu Mutwalo omulamba, Alufa era Omega, Omulandira era Ezzadde Iya Dawudi, Kitaffe, Omwana n'Omwoyo Omutukuvu — oyo Yenna mu Byonna."

Isaaya 9:6,

*"Kubanga Omwana Atuzaaliddwa ffe, Omwana ow'obulenzi Aweereddwa ffe; n'okufuga kunaabanga ku kibegabega Kye: n'Erinnya Lye liriyitibwa nti Wa Kitalo, Ateesa Ebigambo, Katonda ow'amaanyi, Kitaffe Ataggwaawo, Omukulu w'Emirembe."*

Mu Ye mwe muli okutuukirira okutaliiko kamogo. Wadde okusooka tetwamuteekamu kitibwa, kati tumwagala n'essanyu eritoogerekeka. Ayimiridde wakati mu kkanisa, era tujja kuyimba amatendo Ge, kubanga Ye ye muwanguzi ow'amaanyi Afuga ekkanisa (omugole We). Yagula omugole oyo. Ye nannyini ye. Wuwe era Amulabirira. Ye Kabaka waffe era tuli bwakabaka Bwe, omugabo gwe ogutaggwaawo.

Kati munajjukira nti ku ntandikwa y'olunyiriri olwomusanvu, nnagambye nti olwomwenda lujja kutuyamba okulutegeera. Nsusbira mwalabye kye nnabadde ntegeeza. Yesu Yeeraga nga OYO omutukuvu, ow'Amazima, (obaowa namaddala yekka) Oyo Alina ekisumuluzo kya Dawudi, Oyo Eyaggulawo era n'Aggalawo. Era ekkyo kituufu ddala. Enjogera ezo zimunyyonnyolera ddala. Naye Abayudaaya mu biro Bye baamugaana n'ebyo byonna bye Yali. Baagaana Omulokozi waabwe n'amakulu Ge gye bali. Era n'abo abeeyita abakulisitaayo akoze ekintu kye kimu. Bakoze ekkyo kyennyini Abayudaaya kye baakola. Abayudaaya baamukomerera olwo ne badda ku mukkiriza omutuufu. Oyo eyeyita omukulisitaayo amukomeredde buggyaa n'adda ku kkanisa entuufu agisaanyewo. Naye Katonda wa mazima, era Oyo Asingayo bona wa kukomawo era bw'Alidda Aliraga Omufuzi kyali. Era nga kati Yeeekakasiza ddala eri ensi, n'ensi yonna evunnama wansi w'ebigere Bye, mu kiseera ekkyo ensi yonna erivunnama wansi w'ebigere by'abatukuvu ng'ekakasa nti baali batuufu, okubeera naye. Katonda Aweebwe ekitiibwa emirembe n'emirembe!

### Omulembe Gw'oluggi Oluggule

Okubikkulirwa 3:8,

*"Mmanyi ebikolwa byo: laba, nnateeka mu maaso go oluggi olugguddwawo, omuntu*

*yenna Iw'atayinza kuggalawo: ng'olina amaanyi matono, n'okwata Ekigambo Kyange, so teweegaana Linnya Lyange."*

Enjogera esooka mu lunyiriri luno "Mmanyi ebikolwa byo," yeekenneenyezeddwa mu kitundu ky'olunyiriri ekisigaddeyo, kubanga emirimu gyabwe gyali gikwataganako "n'oluggi oluggule," "amaanyi amatono," "Ekigambo n'Erinnya"

Okusobola okutegeera amakulu amangi agali mu "Laba nteeka mu maaso gammwe oluggi oluggule, era tewali muntu asobola kuluggala", tuteekwa kati okujukira kiki ekyayogerwa ku buli mulembe ogwaggwaako omulala ne gutandika. Waliwo okukwatagana, okusaanuuka oba okuseebengerera, nga guyingira mu mulala so si okugwa embagirawo omulembe omulala ne gutandikirawo. Omulembe guno guyingirira ddala mu mulembe oguddirira. Era omulembe guno teguyingira buyingizi mu mulembe ogusembayo, wabula omulembe ogusembayo mu ngeri nnyingi ebirimu byeyongera bwetyongezi mu maaso okuva ku ebyo eby'ogwayita. Ogwomusanvu (omulembe omumpi ennyo) gwekunngaanyaamu olw'omulimu omumpi ebibi byonna ebya buli mu mulembe, ate nga ddala bye bisangibwa mu Pentekoote. Omulembe gwa Firaderufiya guba gunaatera okuggwaako, ogwa Lawodikiya guyingira mangu nga guleeta enngaano ey'omu nsiko n'eyo ennungi okukungulibwa,

*"Musooke musibe ey'omu nsiko eyokebwe: naye mukunngaaye ennungi mu ggwanika Lyange".*

Matayo 13:30.

Mwattu, jjukira, nti Omulembe gwa Saadi gwatandika Okudda Obujja okwo okuteekwa okwetyongera okutuusa empeke eyasimbibwa ku Pentekoote Iw'eyita mu mitendera gyonna egy'okusimbibwa, okufukirira okulabirirwa n'ebirala n'ekomawo ku nsigo embereberye. Nga kino kikyagenda mu maaso, enngaano embi eyasimbibwa nayo eriyita mu mitendera gyayo era ekungulibwe. Ky'ekyo kyennyini ekiriwo ekigenda mu maaso kye tulaba. Bw'olowooza ku biseera ebisimbibwamu n'ebikungulwamu emmere, oynza okufunira ddala ekifaananyi ekirungi ku kino. Ekisimbe kino ky'olaba nga kikulira ddala mu biseera eby'ebbugumu mangu ddala kirabika nga kigenda kuleeta nsigo. Tosobola kumanya ddi ekyeya lwe kiggwaako, kyagenda kikendeera mpola. Bwe gityo emirembe bwe giri, na ddala gino ebiri egisembayo.

Omulembe guno Yesu gw'Agamba, "Nzija MANGU" olunyiriri 11. Ekyo kifuula ogusembayo okuba nti mumpi nnyo. Lawodikiya gwe mulembe ogwa omulimu omwango. Gusalibwako nga tegunnaggwaako.

Kati ka tukwatire ddala ku LUGGI OLUGGULE omuntu Iw'atasobola kuggalawo. Okusooka njagala kwogera ku luggi oluggule nga lwe lulaga amakulu g'omulimu gw'obuminsani obw'ekitalo mu mulembe ogwo. Okwewaayo okukolera Mukama obuminsani Pawulo yakuyita oluggi oluggule.

Abakkolinso 2:12

*"Naye bwe nnajja mu Tulowa olw'Enjiri ya Kristo, era oluggi bwe Iwanzigulirwawo mu Mukama waffe."*

Kale tuyinza okulaba nga tugeraageranya Ebyawandiikibwa nti oluggi luno oluggule Iwalaga obukulu bw'okusaasaanya Enjiri okw'ekitalo ensi kwe yali erabye.

Wano waliwo kye njagala mulabe. Katonda Akolera mu bisatu, si bwe kiri? Gwali Mulembe gwakusatu oba ogwa Perugamo ekkanisa lwe yafumbiriganwa n'eggwanga. Ebikolwa by'Abanikolayiti byali bifuisse enjigiriza y'Abanikolayiti. Omulembe ogwo gwe gwali OLUGGI OLUGGULE eri omuzabbibu ogw'obulimba. Lumu byawagirwa ab'obuyinza abafuzi b'eggwanga ne bifuumkira ddala enkola ey'ensi yonna wadde byali birina erinnya nti Bakulisitaayo. Kale ne bisaasaana ng'omuliro gw'oluyiira. Naye kati, oluvannyuma Iw'emirembe esatu, era nga wamaze okubaawo okufuba ennyo okw'okukkiriza ekyatwala ebbanga eggwanvu, wajjawo OLUGGI OLUGGULE eri amazima. Ekigambo kya Mukama kati kirina olunaku Iwakyo. Kwo okuba omulembe ogwokutaano gwali gutaddewo aw'okusinziira enkola eno ey'amaanyi, nga bwe gwatuwa okuvumbula, obufuzi bw'amatwale, okukuba ebitabo n'ebirala.

Kyandibadde kya kyewuunyo singa "oluggi oluggule" luno lugoberera enkola Entukuvu eya Pentekoote eyatandikibwa mu Abaebulaniya 2:1-4, "Kye kivudde kitugwanira okusinga ennyo okulowooleza ddala ebyawulirwa kabekasinge tuwaba ne tubivaako. Kuba oba ng'Ekigambo ekyayogerwa bamalayika kyanywera na buli kyonoono n'obutawulira byaweebwanga empeera ey'ensonga; ffe tuliwona tutya bwe tulireka obulokozi obukulu obwenkana awo? Obwo obwasooka okwogerwa Mukama waffe, ne

bulyoka bututegeerezebwa ddala abaabuwulira. Era Katonda ng'Ategeereza wamu nabo, mu bubonero ne mu byamagero, era ne mu by'amaanyi ebitali bimu era ne mu by'Omwoyo Omutukuvu, nga bwe Yayagalanga yekka." Kati mumanyi nti enkola eno ye ya Yesu, kubanga Ye Mwene Ye Yagamba bw'Atyo.

Makko 16:15-20,

*"N'Abagamba nti Mugende mu nsi zonna, mubuulire enjiri eri ebitonde byonna.*

*Akkiriza n'abatizibwa, alirokoka, naye atakkiriza omusango gulimusinga.*

*Era obubonero buno bunaagendanga n'abo abakkiriza: banaagobanga emizimu mu Linnya lyange; banaayogeranga ennimi empya;*

*banaakwatanga ku misota, bwe banaanywanga ekintu ekitta, tekiibakolenga kabi n'akatono; banassangako emikono ku balwadde nabo banaawonanga.*

*Awo Mukama waffe Yesu bwe Yamala okwogera nabo, n'Atwalibwa mu ggulu, n'Atuula ku mukono ogwa ddyo ogwa Katonda.*

*Bali ne bafuluma, ne babuulira wonna wonna, Mukama waffe ng'Akolera wamu nabo era ng'Anyweza ekigambo mu bubonero obwakiddiriranga. Amiina".*

Tabagambanga kugenda mu nsi yonna kuzimba matendekero ga kuyigiririzaamu Bayibili; era Tabagambanga kugaba bitabo. Kati ebintu ebyo birungi, naye Yesu kye Yabagamba okukola kwali KUBUULIRA NJIRI — kwekwata ku KIGAMBO olwo obubonero bugoberere. Ennyanjula eyasookera ddala gye tulina engeri Obwakabaka bwa Katonda gye bwali bulina okubuulirwanu esangibwa we Yatumira ekkumi n'babiri. Mu Matayo 10:1-8 Yabatuma n'Abalagira bw'Ati;

*"N'Ayita abayigirizwa Be ekkumi n'babiri, n'Abawa obuyinza ku dayimooni omubi, okumugobanga, n'okuwonyanya endwadde zonna n'obunafu bwonna.*

*Abatume abo ekkumi n'babiri, amannya gaabwe ge gano: eyasooka ye Simooni, ayitibwa Peetero, ne Andereya muganda we, ne Yakobo omwana wa Zebbedaaayo, ne Yokaana muganda we;*

*Firipo, ne Battolomaayo; Tomasi, ne Matayo omuwooza; Yakobo omwana wa Alufaayo, ne Saddayo;*

*Simooni Omukananaayo, ne Yuda Isukalyoti, ye yamulyamu olukwe.*

*Yesu n'Abatuma abo ekkumi n'Ababuulirira, ng'Agamba nti Temugendanga mu makubo g'ab'amawanga, so temuyingiranga mu bibuga by'Abasamaliya;*

*Naye waakiri mugende eri endiga ezaabula ez'omu nnyumba ya Isiraeri.*

*Bwe mubanga mutambula mubuulirenga nga mugamba nti Obwakabaka obw'omu ggulu bunaatera okutuuka.*

*Muwonyenga abalwadde, muzuukizenga abafu, mulongoosenga abagenge, mugobenga ddayimooni: mwaweebwa buwa, nammwe muwenga buwa."*

Obuweereza buno bwe Yabawa ddala kwali kugabana nabo ku buweereza obubwe, kubanga mu

Matayo 9:35-38,

*"Yesu n'Ayitaayita mu bibuga byonna, n'embuga zonna, ng'Ayigiriza mu makunngaaniro gaabwe, ng'Abuulira Enjiri ey'obwakabaka, ng'Awonya endwadde zonna n'obunafu bwonna.*

*Naye bwe Yalaba ebibiina, n'Abasaasira, kubanga baali bakooye nnyo nga basaasaanye, ng'endiga ezitalina musumba.*

*N'Alyoka Agamba abayigirizwa Be nti, Eby'okukungula bingi, naye abakozi be batono. Kale musabe Omwami w'eb'y'okukungula, Asindike abakozi mu by'okukungula Bye."*

Kati abantu bangi balowooza nti Abatume baaweebwa obuweereza buno Mukama waffe Yesu, n'olw'ekyo olwafa nabwo ne bukoma. Ekyo si bwe kiri.

Wano mu Lukka 10:1-9, tusanga nti mu nnaku ez'olugendo Lwe olw'omu nsi Yali Yatandika dda okugabira ababe obuweereza obw'obuyinza

*"Awo oluvannyuma Iw'ebyo Mukama waffe n'Alonda abalala nsanvu, n'Abatuma kinnababiryre mu maaso Ge okugenda mu buli kibuga na buli kifo gy'Agenda okujja Ye.*

*N'Abagamba nti Okukungula Kwe kungi, naye abakunguzi be batono: kale musabe Mukama w'okukungula okutuma abakunguzi mu kukungula Kwe.*

*Mugende: laba Mbatuma mmwe ng'abaana b'endiga wakati mu misege.*

*Temutwala nsawo, newankubadde olukoba, newankubadde engatto; so temulamusu muntu mu kkubo.*

*Na buli nnyumba gye musingiram, musookenga okugamba nti Emirembe gibe mu nnyumba muno.*

*Oba nga mulimu Omwana w'emirembe, emirembe gyammwe ginaaberanga ku ye; naye ova nga si bwe kityo, ate ginaddanga gye muli.*

*Mubeerenga mu nnyumba omwo nga mulya nga munywa eby'ewaabwe, kubanga omukozi w'omulimu asaanira empeera ye. Temuvanga mu nnyumba emu okuyingira mu ndala.*

*Na buli kibuga kye munaatukangamu, ne babasembeza, mulyanga buli bye bassanga mu maaso gammwe;*

*muwonyenga abalwadde abalimu, mubagambenga nti Obwakabaka bwa Katonda bubasemberedde kumpi."*

Ani ayinza okwannganga okuwakanya obuweereza bwa Firipo obw'amaanyi? Ani ayinza okuwakanya obuweereza obw'amaanyi obwa Irenaeus, Martin, Columba, Patrick n'abalala abatabalika Katonda be Yafukako amafuta?

Ddala. Bayibuli ly'ekkubo lyennyni ery'oluggi oluggule. Era njagala okwongera obujulizi bwange ku ebyo. Ensonga lwaki nnina ekyo okukikola eri nti lwa kuba nnyinza okwogera nga nnina bukakafu bwokka ku biki Katonda by'Akoze mu bulamu bwange. Kale bwe munanzikirizaako wano nja kubabuulira ddala nga bwe nkakasa nti Yesu y'Omoo jjo, leero n'emirembe gyonna nti era n'amaanyi ga Katonda gakyaliwo eri abo abanaamusembeza ne bamukkiriza.

Mu lugendo Iwange olwa minsoni y'omu Maserengeta ga Africa, Katonda Yatuwa nnyo omukisa bwe nnali e Durban ekifo kyokka ekyali kisobola okutuza nnamungi w'abantu kyali kisaawe ekiddukirwamu ng'ekisaawe ekyo kye kyokubiri obunene mu nsi yonna. Abantu obungi baali basukka mu mitwalo ekkumi. Okusobola okukuma obutebenkevu n'amateeka baateekamu enkomera okwawula amawanga agatali gamu. Baatum ebikumi n'ebikumi by'abasirikale ba Puliisi okusirisanga agabiina ago. Emmeeme ezo ezaalina enjala zaali zisiyagguse agagendo. Nnaabakyala w'omu Rhodesia (Zimbabwe) yajja n'eggaali y'omukka eyaliko ebiyumba 27 nga bijjude ab'amawanga g'omu Africa. Baalafubana okuyita mu masamba ne mu nsozi nga abamu bawese bannaabwe abaagalwa abaali beetaaga okuyambilwa. Eggwanga lyonna lyabuguumirira olw'emirimu eg'amaanyi egayolesebwa Omwoyo Omutukuvu.

Lumu olweggulo nnali ntandika okuveereza, omu ku nkumi z'Abasiraamu yajja ku kadaala. Omukyala ono nga bwe yayimirira mu maaso gange, omuminsani eri Abasiraamu yatandika okumusabira eri Mukama, "Oh, emmeeme eyo. Oh, emmeeme eyo ey'omuwendo." Yali (omuminsani) amazeeyo emyaka n'emyaka era okusinziira ku bujulizi bwe, yali talabangako ku Musiraamu alokoka okuggyako OMU yekka. Okusooka bo baali ba ggwanga ery'Abameedi-Abaperusi eryali lisibuka mu mawanga abiri ate nga bo amateeka gaabwe tegakyuka. Bakakanyavu nnyo okuwangulwa. Kirabika nti "Omusiraamu aba Musiraamu Olubeerera" tteeka mu bo. Kale, ng'akyayimiridde mu maaso gange, nnatandika okwogera gy'ali n'eri abo bona enkumi n'enkumi nga mpita mu bataputa. Nnagamba "Si bwe kiri nti abaminsani baakubuulirako ku YESU Eyajja okukulokola?" Kale, mwandirabye ku bantu bwe beetunulira ekyo nga nkyogedde. Olwo bwe baddamu nti ekyo kituufu ne nngenda mu maaso ne nngamba, "Naye abaminsane baakusomerako mu Kitabo kino (ne mbawanikira waggulu Bayibuli balabe) nti Yesu ono y'omu Yali muwonya ow'amaanyi, nti era Yali wa kubeera mu bantu Be emirembe gyonna okutuusa Iw'Alijja okubeetwalira gy'Ali? Baakubuulira nti olw'Omwoyo oyo omu Eyali mu bo era Eyali mu Yesu nti baali ba kusobola okukola emirimu eg'ekitalo nga Ye Yesu bwe Yakola? Baakubuulira nti osobola okuwonyezebwa nga bw'osobola okulokolebwa? Bameka ku mmwe abandyagadde okulaba Yesu ono y'omu ng'Ajja mu ffe era ng'Akola ebintu bye bimu nga bye Yakola wano ku nsi edda ennyo?" Ekyo bona baakyagala. Ekyo kintu kimu bona kye bakkiriza.

Olwo nnagenda mu maaso, "Yesu bw'Anaakola n'Omwoyo We ebyo bye Yakola edda bwe Yali ku nsi, olwo, munakkiriza Ekigambo Kye?" Era wano omukazi ono Omusiraamu yali akyali awo mu maaso gange. Omwoyo n'Atandika okukola ng'Ayita mu nze.

Ne mmugamba, "Kaakati, omanyi nti nze sikumanyi. Sisobola na kwogera lulimi Iwo." Ekyo n'akikkiriza. Ne nngamba, "Ku by'okwonya, omanyi nti nze sisobola. Naye wawulidde obubaka olweggulo era n'ontegeera." Omuvvuunuzi we Omuyindi

n'amuddiramu nti ategedde, kubanga yali asomye Endagaano Empya.

Kati Abasiraamu baasibuka mu Ibulayimu. Bakkiririza mu Katonda Omu. Wabula tebakkiriza nti Yesu Mwana wa Katonda okuggyako okutwala Muhamadi okuba nti ye nnabbi We. Bagamba nti Yesu Tafanga n'Azuukira. Ekyo kibasomesewa bakabona baabwe era bakikkiriza.

Nnagamba, "Naye Yesu Yafa n'Azuukira nate. Yatuma nate Omwoyo We n'Adda mu kkanisa. Omwoyo Oyo Eyamulimu y'omu y'Ali ne mu kkanisa kaakano, Asobola era Ajja kukola ebyo Yesu bye Yakola. Yagamba mu Yokaana 5:19,

*"Omwana Tayinza Yekka kukola kintu bw'Atalabira ku Kitaawe ng'Akola: kubanga Ye by'Akola byonna, n'Omwana by'Akola bw'Atyo."*

Kati olwo singa Yesu Anajja n'Ambikkulira ekizibu kyo oba ekikuleese wano — bw'Ambuulira ebyafaayo byo ddala onakkiriza eby'omu maaso?"

Yagamba ng'ayita mu muvvuunuzi we, "Yee, nsobola."

Ne nngamba nti "Kale, Akikole."

Abasiraamu abo baali batwegese amaaso obutamagamaga. Bonna baali bagezaako okulengera balabe kiki ekigenda okubaawo.

Olwo Omwoyo Omutukuvu n'Ayogera, "Balo musajja mumpi munene alina obusulubu obuddugavu. Olina abaana babiri. Ennaku nga ssatu emabegako waliko ew'omusawo n'akukebera. Olina ekizimba mu lubuto."

Yakoteka omutwe gwe n'agamba, "Ekyo kituufu."

Ne mmubuuza, "Lwaki wazze gye ndi, nze Omukulisiaayo? Lwaki tewagenze eri nnabbi wo Muhamadi?"

N'agamba, "Ndowooza osobola okunnyamba." Ne nngamba, "Sisobola kukuyamba, naye bw'otwala Yesu ng'Omulokozi wo, Oyo Ali wano kati, era Amanyi byonna ebikufaako, Ajja kukuyamba."

N'agamba, "Nzikiriza Yesu ng'Omulokozi wange." Ekyo kyamala. Yawonyezebwa n'abasiraamu abalala ng'omutwalo gumu olunaku olwo baalokoka kubanga Enjiri yabuulirwa mu Kigambo ne mu maanyi. Katonda Tagambanga muntu kukola myaka makumi asatu n'atakungula kantu. Yatuwa oluggi oluggule olw'Ekgambo n'Amaanyi era ebyo bye tuteekwa okukoza. Ebyo bye byawa Pawulo obuweereza obw'ekitalo. I Abakkolinso 2:4, "Era okubuulira kwange n'ebigambo byange tebyabanga mu bigambo eby'amagezi ag'omuntu ebisendasenda wabula mu kukola kw'Omwoyo n'amaanyi."

Kati mumpulirize. Nga tukyali mu lugendo luno, nnali nninnya ennyonyi mu kibuga New Salisbury, Rhodesia (Zimbabwe) ne ndaba abantu bana nga balina Passport z'America. Nagenda gye bali ne njogera nabo, "Bannange mmwe, ndaba mulina Passport z'America. Mulina we mugenda?"

Omuvubuka n'anzipamu, "Nedda, ffenna tuli baminsani wano."

"Nga kirungi," ne nziramu. "Muli ku Iwammwe oba mulina ekibiina kye mukolera?"

N'anzipamu, "Tuli Bamethodist. Tuva mu Wilmore, mu ssaza Iye Kentucky."

Ko nze, "Kumpi eyo gye nsibuka."

"Wandiba nga ggwe ow'Oluganda Branham ava erudda eyo. Si ye ggwe?"

Ko nze, "Ekyo kituufu." Ekyo kyamuwonya. Teyasobola kuddamu kwogera kintu kirala — era engeri abawala abo abasatu abalala gye baatunuuliganamu nga yeewuunyisa! Ne nngamba, "sooka olindeko mutabani, njagala kwogerako gye muli mwenna ku bintu ebimu eby'Ekgulisiaayo, ffenna nga bwe tuli Abakulisiaayo era nga bwe tuli wano olw'ekigendererwa ekikulu. Kati mugamba nti mwenna abana mumaze wano ebbanga lya myaka ebiri. Muyinza okwogera mu Linnya lya Mukama nti musobola okusonga olunwe Iwammwe ku muntu omu gwe mubuulidde enjiri Mukama n'amulokola?" Baali tebakisobola.

"Bawala, saagala kubanyiiza," ne nngamba, "naye mwandibadde muli ka nga muyamba bannyammwe okwoza amasowaani. Tolina mulimu gwonna bweru okuggyako ng'ojuiddwa n'Omwoyo Omutukuvu era ng'obuulira Enjiri entuufu mu kweyleka kw'amaanyi ag'Omwoyo Omutukuvu. Bw'oba nga tolaba bubonero Yesu bwe Yagamba nti oliraba, ensonga eri Iwakuba nti tobuulira Njiri ntuuufu."

Leka nneeyongerek mu maaso katono mbalage ebintu engeri gye biyinza okubaamu ku minsoni. Ssigamba nti byonna bibeera bwe biti wabula nsaaliddwa nti ebisinga obungi

bwe biri. Nali nkyali ku lugendo luno Iwe lumu eyo nga nnambula ekibuga Durban, nga tuli n'omukulu w'ekibuga (mayor) ne ndaba omutuuze omunnansi ng'ayambadde akabonero mu bulago bwe okwali kusibiddwa akafaananyi akabajje. Nnabuuza mukwano gwange omugaso oba makulu ki ag'ebyo ebyali mu kafaananyi n'akanyere bye yali alina n'anzipamu nti omunnansi bwe yayingiranga Obukulisitaayo baamuteekangako akabonero. Ekyo ddala kyannewuunyisa, kubanga wuuno omuntu eyali yeeyita Omukulisitaayo ate ng'atambula n'akafaananyi kale ne mbuuza ekyo kijja kitya.

Yagamba, "Nsobola okwogera olulimi Iwe. Tugende twogere naye."

Kale ne tugenda gy'ali omukulu w'Ekibuga n'anzipamuunulira. Nnabuuza munnansi oba nga yali Mukulisitaayo. N'akakasiza ddala nti yali. Ne mmubuuza Iwaki yali ayita n'akafaananyi akabajje oba nga yali Muklisitaayo. Yaddamu nti kyali kifaananyi kitaawe kye yayabalanga n'akimulekera. Bwe nnamugamba nti tewali Mukulisitaayo ateequa kutambula na bifaananyi yaddamu nti ekifaananyi kino kyali kya mugaso nnyo eri kitaawe. Nnayagala okumanyira ddala ngeri ki gye kyagasaamu kitaawe, n'agamba nti lumu empologoma yali esooberera kitaawe, yakoleeza omuliro n'ayogera eri ekifaananyi mu ngeri gye yali asomeseddwa omusawo ow'ekinnansi. Empologoma yamuleka. Nnamugamba nti omuliro gwe gwaddusa empologoma so si kibajje ng'omuliro bwe gutiisa ensolo zonna ez'omu nsiko. Sigenda kwerabira bye yanzipamu. Yanngamba, "Kwe kugamba bwe kityo bwe kiri, Amoyah (Omwoyo) bw'alemwa, olwo ekabajje kino kyo tekisobola kulemwa."

(Byonna ebyaliwo mu lugendo luno mu bujjuvu bisangibwa mu Kitabo ekiyitibwa, William Branham, Nnabbi, Akyalira South Africa.)

Obwo bwe buzibu Abakulisitaayo abasinga obungi bwe balina kubanga Ekigambo tekyabaleeterwa nga kiyita mu luggi oluggule olwasooka olwa Pentekoote.

Kati ka tuddeyo ku luggi oluggule olwa minsoni y'Omulembe gwa Firaderufiya. Tegwalina luggi luggule olw'amaanyi Iwe gwali guteekwa okuba nalwo. Laba olunyiriri luno Iwe lumu Ayogera ku luggi oluggule. Agamba, "Olina amaanyi matono." Ekyo kituufu. AMAANYI g'Omwoyo mu mulembe ogwo tegaalimu. Ekigambo kyabuulirwa bulungi. Gwasobola bulungi okuleeta emmeeme eri obulokozi. Naye amaanyi ga Katonda ag'ekitalo agaalaga emirimu Gye eg'yamaanyi agaayoleka omukono Gwe tegaalimu okuggyako mu bibiina ebyali byesuddesudde. Naye ate, Katonda Yeebazibwe, gaali gakula era gaali geeyongedde kw'ago agaaliwo mu biro eby'okuddaabulula.

Mu mulembe guno omusajja bulijjo gwe tuyita kitaawe wa minsoni mwe yafulumira. William Carey, omusajja eyali omukozi w'engatto mu kyalo, omusumba w'ekkanisa eyali mu Moulton mu Bungereza ng'eyitibwa Particular Baptist Church, yacamula nnyo abantu okuyitirira bwe yabuulira ku, "oba ng'ekiragiro ekyaweebwa Abatume okuyigiriza amawanga gonna kyali tekyetaagisa ku buli bawereera abaddawo okutuusa ku nkomerero y'ensi, olwo n'ebisuubizo ebikigenderako bwe byalina okuba." Yawakanyizibwa ab'eddiini ya Calvinism abaagenda mu buziba ku njigiriza y'okulondebwa nga bakkiriza nti abo bona ab'okulokoka BAJJA kulokoka n'omulimu gw'obuminsane gwali gwa kuwakanya omulimu gw'Omwoyo. Naye Andrew Fuller ng'ayita mu kusonda ssente n'okubuulira yayamba omwami Carey. Ekyavaamu, mu mwaka 1792 waatandikibwawo ekibiina Enjiri ebuulirwe mu mawanga gonna. Ekibiina kino kyatuma Carey eyalina ennyo emikisa mu kuleeta eri Kristo emyoyo mu India. Mu mwaka 1795 Obukulisitaayo obucamufu bwatondawo ekibiina ekyayitibwa London Missionary Society kye tumanyi obulungi nti kyasonda obukadde n'obukadde bwa ssente ne kituma abaminsani enkumi n'enkumi okumala emyaka batuukirize ebyo Mukama by'Ayagala. Omwoyo wa Katonda kati Yali Akola ne "Endiga Endala" kyandiba nti abakkiriza abo ze baali bakaabira mu mitima gy'abakkiriza abo abaalina okuyaayaana.

"Ntaddeko oluggi oluggule." Njagala nate okutunuulira ebigambo bino. Ku luno, newankubadde sija kubyawula ku minsoni, nngenda kubaleetera ekirowoozo ekigenda ennyo ebuziba mu mulembe ogusembayo. Nga bwe mmaze okubagambako, omulembe guno guggweerera mpola nga guyingira mu mulembe ogusembayo. Mu mulembe guno Yesu mwe Yayogerera "Nzija mangu" (olunyiriri 11), ne mu gusembayo Yali Agenda "kumaliriza omulimu Agusaleko mu butuukirivu; kubanga Alikola omulimu omumpi ku nsi." Abaruumi 9:28. Laba olunyiriri luno mu Okubikkulirwa 3:8 bwe lugamba —I "oluggi oluggule, amaanyi amatono, Ekigambo, Erinnya." Oluggi olwo oluggule lukwatagana ku bintu byonsatule. Kati oluggi lulina makulu ki?

Mu Yokaana 10:7, kigamba,

*"Awo Yesu n'Abagamba nate, Ddala ddala Mbagamba nti NZE MULYANGO GW'EKISIBO KY'ENDIGA."*

Ekyo kituufu 'NZE' gwe mulyango gw'endiga. Kati eno enjogera si mbi oba nkadde. Mu butuufu bwe kiri bwe kityo. Laba mu Yokaana 10. Yesu n'Abagamba bwe Yali Abawa olugero luno, Yeeyita omusumba. Olwo ne Yeeyita omulyango. Era ekyo ddala omusumba ky'Ali eri Endiga. Ddala Ye gwe mulyango gwazo.

Bwe nnali mu Buvanjuba nnalaba ng'ekiro omusumba endiga zonna azikunngaanya wamu. Yaziteekanga mu kisibo. Olwo n'alyoka azibala. Bwe yakakasanga nti zonna, mweziri yagalimiranga mu mulyango omuggule ogw'ekisibo ye n'afuuka omulyango gwennyini ogw'ekisibo nga tewali n'emu esobola kufuluma wadde okuyingira wabula ye nga y'agikkirizza. Ye yali oluggi. Olunaku olwaddirira bwe twali ne mukwano gwange nga tuvuga Jeep era nga tugenda nnalaba omusumba ng'atandika okukulembera ekisibo kye mu kibuga. Mangu ddala ebidduka byayimirira endiga zisooke ziyyitewo. Ebibuga by'omu buvanjuba tebirinha bino ebya wano. Eby'amaguzi byaffe tubiteeka munda: naye eyo, kiringa bw'olaba akatale k'abalimi ng'ebirime bijjudde ku mabbali g'enguudo birabibwe abayita bagule. Muli nnalowooza, "Oh abange, wano akagugumuko we katandakira. Lindako endiga ezo zirabe emmere eyo yonna awo eyo ebweru. Naye ng'omusumba bwe yakulemberamu, endiga ezo zaagoberera bugoberezi nga w'ayita nazo we ziyyitira ddala. Zaatinuuliranga ebirungi ebyo byonna, naye tewali yadde emu eyakwata ku kintu. Oh, singa nnali mmanni olulimi lwabwe, nnandiyimirizza emmotoka ne mbabuulira enjiri okusinziira ku kye nnali nnaakalaba.

Bw'obeera endiga y'Omusumba Omukulu, ogoberera ng'otambulira mu bigere Bye, ng'endiga ezo bwe zikola. Tojja kukemebwa kukyuka mabbali olw'ekimuli ky'ekkanisa ekinene, oba okuwuliriza eddoboozi ly'abamu ku bayivu oba bakakensa abalina amadiguli; D.D, Ph.D oba L.L.D., wabula ojja kusigala n'Omusumba. Bayibuli egamba nti endiga zimanyi eddoboozi Lye era zimugoberera naye ery'omugenyi liziddusa buddusa zinoonye Omusumba waazo omutuufu. Mukama Yeebazibwe.

Naye ebyo si bye byokka bye nnalaba era bye nnayiga eyo. Lumu matandika okulowooza ku basajja be nnali ndabye mu malundiro nga balunda ebisolo ebitali bimu. Omu ng'alabirira mbizzi, omulala mbuzi, omulala nngamira omulala nnyumbu n'ebirala. Kale ne mbuuza munnange eyali abeera eyo, abantu abo bwe baali bayitibwa. "Oh," n'addamu, "bayitibwa basumba."

Ekyo nnali sisobola kukkiriza. Ne nziramu, "Totegeeza nti BONNA basumba. Abasumba balunda ndiga zokka, si bwe kiri?" N'addamu,

"Nedda." "omusumba alisa bulisa muddo ku ttale, n'olw'ekyo omuntu yenna alabirira ensolo nga zirya omuddo ku ttale aba musumba."

Kale, ekyo kyanneewuunyisa. Naye nalaba enjawulo wakati w'abasumba abo ne bali abaalabirira endiga. Ekiro bwe kituuka abalala bona baleka ebisolo byabwe baddeyo eka okuggyako omusumba y'atwala endiga ze n'aziteeka mu kisibo n'agalamira wansi n'afuuka oluggi. Laba, Katonda Yeebazibwe, Omusumba waffe Tatulekerera wadde okutwabulira. Obudde bwe buziba njagala kubeera mu kisibo Kye. Njagala kulabirirwa Ye.

Kale kati, tusobola okulaba nti YESU GWE MULYANGO. Ye lwe luggi olw'endiga. Kati genderera olabe wano kyogera ku MULYANGO OKUGGULIBAWO. Ekyo ki wabula okubikkulirwa okumukwatako? Era Okubikkulirwa okwo kati kuggulawo kutuleetere Amaanyi, okwakaayakana Ekigambo n'okugulumiza Erinnya Lye. Wakati mu mirembe ebiri egayita Okubikkulirwa kw'Obwakatonda ku Yesu Kristo kwayitimuka mu maaso gaffe. Yee, twamanya nti Yali Katonda. Yandibadde Atya Omulokozi waffe mu ngeri endala etali eyo? Naye okumanya nti Yali KATONDA KYOKKA, OBA KATONDA YEKKA, nti Ye Yali Alufa ne Omega, nti "Yesu ono Ye Yali MUKAMA ERA KRISTO — NGA KUMUFUULA MUKAMA ERA YESU KRISTO, KITAFFE OMWANA ERA OMWOYO OMUTUKUVU OMUNTU OMU — okwali kubuze okuva emirembe gy'ekkanisa egyasooka we gyabeererawo, naye kaakano tukulaba nate. Okubikkulirwa KW'EKO KYE YALI kwali kukomyewo. Ddala obulamba bwa Katonda si Katonda Alimu abantu abasatu n'okubeerawo kw'omuntu omu (one personality) kubanga omuntu okubeerawo kyetaagisa embeera oba enneeyisa y'obuntu okuyitibwa omuntu. Bwe waba waliwo enneeyisa oba embeera y'obuntu (personality) EMU, waba waliwo omuntu omu yekka. Naye abo abakkiririza mu bantu abasatu balina obulamba bwa Katonda nga mulimu bakatonda basatu era balina omusango gw'okumenya etteeka erisooka.

Naye okubikkulirwa kw'obulamba bwa Katonda kukomyewo. Kati ekkanisa ey'amazima eyinza okuzimbibwa mu maanyi nate. Oluvannyuma lw'ebbbanga lino lyonna emanyi Ani Mukama waayo. Nate kaakano TUBATIZIBWA MU LINNYA LYA MUKAMA YESU nga bwe baakola ku Pentekoote.

Ka mbabuulireko ekirooto Katonda kye Yampa ekikwata ku mbatiza ya tirinita. Kino tekwali kwolesebwa, wabula kirooto. Mumanyi, nkakasa, nti ogumu ku mikisa gy'emirembe gy'ekkanisa kwali kufuna birooto nga bibaweebwa Omwoyo Omutukuvu, okufaanana ng'omuntu bw'afuna okwolesebwa. Zaali essaawa nga mwenda ez'ekiro ekyakeesa Olwomukaaga. Nnali nnaakazuukuka okuwa Joseph amazzi ag'okunywa. Olwagalamira wansi otulo twankwata mangu ddala ne ndoota ekirooto kino. Nnalaba omusajja gwe nnatwala nga kitange. Yali nnamige. Ne ndaba n'omukazi eyali ateequa okuba mmange naye teyamufaanana, era ng'omusajja bw'ataafanana kitange. Omusajja ono yali mukodo nnyo eri mukazi we. Yalina embukuuli ng'eriko ensonda ssatu. Omanyi bw'oddira omuggo n'oguyimiriza n'ogukuba ku ludda olumu n'embazzi, guvaamu oluku lwa nsonda ssatu nga nsongovu ng'embazzi. Bw'etyo bwe yali. Yaddiranga embukuuli eno n'agimukubisa, n'amusuula wansi. Bwe yagalamiranga awo ng'akaaba, yatambulanga ng'atadde ekifuba, nga yeeraga era ng'alina amalala kwe kugamba nga kirabika nti yeenyumirizanga mu kukuba kakazi kattu kano era nga muli awulira obumativu. Buli Iwe kaasitukanga n'akafuntula. Ssaayagala kye yali akola, naye bwe nnafumiitiriza okumuyimiriza ku ekyo kye yali akola, ne ndowooza, "sisobola kwannganga musajja oyo — muyitirivu obunene. Ate alinnganga kitange." Naye mu nda mu nze nnali mmanyi nti teyali kitange era nnamanya tewali muntu akkirizibwa kuyisa mukazi mu ngeriefaananako bw'etyo. Nnamusemberera ne mmusikambula ekitogi ne mmukyusa ne mmugamba nti "Tokkirizibwa kumukuba." Era olwayogera ekyo ebinywa byange ne bizimbulukuka ne ndabika ng'omusajja ow'ekitalo. Omusajja bwe yibiraba n'annekanga. Ne nngamba, "Ddamu omukube tunaakwatagana." Yeekengera okuddamu okumukuba, olwo ekirooto ne kikoma awo.

Amangu ago nnazuukuka. Nneewuunya ekintu ekyo ekitali kya bulijjo. Nneewuunya kiki ekyandoosa ku mukazi oyo, mangu ddala bwe Yajja, ne ntegeera okubeerawo kwa Katonda olwo n'Ampa okuvvuunulwa kw'ekirooto. (Kati mmwe abantu mumanyi nti sivvuunula buvvuunuzi birooto byammwe; wabula emirundi mingi, mbabuuliddenga bye muloose kale ne muba nga kibadde tekibeetagisa kumbuulira.) Omukazi kabonero akalaga ekkanisa ey'ensi leero. Nnazaalibwa wakati mu googolimbo ono — googolimbo ono ekkanisa mweri. Yali ateequa kuba mukazi muzadde (ye nnyina wa bamalaaya). Bba ge madiini agamufuga. Bbulooka ey'ensonda essatu y'enjigiriza enkyamu ey'okubatiza mu tirinita. Buli Iwe yatandikanga okusituka (amakulu g'ekyo gali nti ekibiina kyatandika okukkiriza amazima) yamukubanga n'agwa wansi ng'amukubisa enjigiriza enkyamu. Yali munene nnyo okusooka nga mmutyua, naye bwe nnamulaba nnakizuula nga nnina ebinywa eby'amaanyi eby'ekitalo. Byali BINYWA bya KUKKIRIZA. Ekyava mu kirooto kyali nti, "Okuva Katonda bw'Ali nange, era ka nnyimirire ku lulwe nnumbe amaanyi g'eddiini ag'ensi mmumulekese okumukuba."

Kali sigezaako kuzimba njigiriza ku kirooto. Ate era sigezaako kunyweza njigiriza yonna gye mpagira nga nkozesu ekirooto. Obulamba bwa Katonda bujjuppe okuvuira ddala mu Lubereberye 1:1 okutuuka mu Kubikkulirwa 22:21. Naye abantu enjigiriza ya tirinita etasangibwa nako mu Byawandiikibwa yeebazibye amaaso, era enjigiriza eyo ekkirizibwa wonna mu nsi era okugezaako okulaba "Katonda Omuntu Omu" tekisoboka busobosi. Oba abantu tebasobola kulaba MAZIMA ga Bulamba bwa Katonda, wabula okubulwanyisa; amazima agasigaddewo tebagenda kusobola kugalaba kubanga OKUBIKKULIRWA KWA YESU KRISTO MU KKANISA YE NE EMIRIMU GYE WAKATI MU KKANISA ERI EMIREMBE OMUSANVU. Ekyo mukifunye? Kati nkakasa mutegeera.

"Olina amaanyi matono, era okuumye Ekigambo Kyange era teweegaanye Linnya Lyange." Kati tumaze okwogerako ng'amaanyi bwe gaali gakomawo. Bwe kyali. Amaanyi g'okubuuuliriza akana n'akataano gaali gakomawo. Abantu baali bavudde ewaabwe nga basaba eddembe ly'okusinza. Ekikoligo ky'amadaala g'obufuzi mu kkanisa kyali kimenyebwa. Gavumenti zaalaba nti kya magezi obutakoonaganya biibina. Mu butuufu, waaliwo abantu abamalirivu okulwanirira eddembe lyabwe ery'okusinza wabula baakulemberwa bubi. Oba oli awo okwoleka kw'amaanyi g'eddiini mu mulembe guno kwali nti wadde Bufalansa yagwa mu bisseera by'enkyukakyuka (revolution), okudda obujja kwa Wesley okw'ekitalo kwateeka wala enkyukakyuka okuva ku Bungereza era ne kuyamba Bungereza okukozesebwa Katonda okumala emyaka mungi egy'ekitiibwa.

Okubuulira kw'Ekigambo tekwasingawo. Setaani nga bwe yayimusa agabiina ge ag'abantu abalowooza nga bwe baagala (free thinkers), abaagunjawo obwa nnaakalyako-ani nga bwe bwasituka, bannaddiini abasembeza buli ddiini bwe basaasaanya kazambi waabwe, Katonda Yayimusa abalwanyi ab'amaanyi abaalina okukkiriza, era emirimu egy'ekitalo egy'ebiwandiiko eby'Ekikulsitiaayo okuyigiriza n'okubuulira byava muno. Ba Spurgeon, ba Park, ba McLaren, ba Edward, ba Bunyan, ba Meuller, ba Brainard, ba Bame, ba Bisopu, bona baasibuka mu biro bino. Baabuulira, baayigiriza era ne bawandiika Ekigambo. Baagulumiza Erinnya Lye.

### **Okulamulwa Kw'omuyudaaya Ow'obulimba**

Okubikkulirwa. 3:9,

*"Laba, Ndeeta abo ab'ekkunngaaniro lya Setaani, abeeyita Abayudaaya, ate nga si Bayudaaya wabula balimba; Nja kubaleeta basinize wansi w'ebigere byo, era Nja kubamanyisa nga Nnakwagala."*

Kati tusobola okulabirawo nti obuzibu buno obw'Abayudaaya ab'obulimba ova abakkiriza ab'obulimba bwali bwatandika dda okubeerawo mu mulembe ogwokubiri. Bano abeeyita Abayudaaya mu ngeri y'obulimba baalabikirawo ng'omulembe ogwasooka gwakaggwa, era nate baddamu okulabika mu mulembe ogwokubiri ng'okuddaabulula kuwedde. Kino tekifaanana kuba nsobi. Mazima ddala, si nsobi. Nkola ya Setaani. Enkola eyo eriwo kutegeka n'okwebala mbu ye yasooka n'olw'ekyo babe nga balina (basaanidde) eddembe n'emikisa eby'enjawulo. Leka mbalage. Emabega mu Mulembe gwa Sumuna abantu bano baalimba ne bagamba nti baali Bayudaaya (oba abakkiriza) ate nga ddala mu butuufu tebaali. Baali ba kkunngaaniro lya Setaani. Baali kibiina kya Setaani ekitegekere ddala (organised), kubanga mu mulembe ogwo mwe tulabira abantu nga batandika okwetulinkiriza okukulembera ab'oluganda abaweeereza (ababuulizi). (Abalabirizi nga bateekeddwa mu masaza, bafuge abakadde b'amakanisa). Ekyaddiridde kye twalabye kiri nti mu mulembe ogwokusatu waaliwo ddala ekifo ekiyitibwa "entebe ya Setaani." Omulembe ogwo gwatuwa okufumbiriganwa wakati w'ekkanisa n'eggwanga. Ekkanisa ng'ewagirwa ab'obuyinza mu ggwanga kyali tekisoboka n'akatono okuginyeenyaako yadde.

Naye Katonda Yamenya enfo eyo wadde baalina obuyinnza bw'eggwanga n'okuddaabulula kwaleeta omusana mungi. Naye kiki ekyabeerawo? Aba Luther baabyetegekera ne beegatta ku ggwanga era nate tulaba ekkunngaaniro lya setaani nga lyeyoleka mu mulembe guno ogwomukaaga. Kali kwo okuba ekibiina kino eky'ekkunngaaniro tekyogera nti kya Setaani. Nedda ssebo. Bagamba nti ba Katonda. Naye balimba. Kubanga oyo Omuyudaaya omutuufu (ekyo kye beeyita mbu) y'oyo Omuyudaaya mu nda — mu Mwoyo. Kale olwo bwe baba nga Bayudaaya ba bulimba kitegeza nti balinga Yuda bw'agamba mu lunyiriri olw'ekkumi n'omwenda (19), "ABATALINA Mwoyo." Abaana ba Katonda bazaaribwa Mwoyo. Bano tebalina Mwoyo n'olw'ekyo SI baana ba Katonda ka babe nga bawakana kwenkana wa era ne bwe bagezaako batya okukakasa nti baana ba Katonda. BAFU. Baana ba kibiina, era n'ebibala ebituufu tebiri mu bo. Baazimbirwa ku musingi gwa bikwate na biragiro byabwe n'enzikiriza era amazima tegali mu bo kubanga amagezi gaabwe bagatadde waggulu w'Ekigambo kya Katonda.

Ka mbalage kye mbadde ngezaako okuyigiriza ebbanga lyonna ku mizabbibu ebiri egaya mu myoyo ebiri egy'enjawulo. Kati twala eky'okulabirako ekyo Yesu ne Yuda. Yesu Ye Yali Omwana wa Katonda. Yuda yali mwana wa kubula. Katonda Yayingira mu Yesu. Setaani yayingira mu Yuda.

Yesu Yalina obuweereza obwali bujjudde Omwoyo Omutukuvu kubanga

*"Katonda bwe Yamufukaako amafuta, Yesu Omunazaaleesi, n'Omwoyo n'amaanyi; Eyagendanga ng'Akola ebirungi, ng'Awonya abo bona abaali bajoogebwa Setaani; kubanga Katonda Yali naye."*

Bikolwa 10:38. Kigamba,

*"Kubanga yabalirwa (Yuda) wamu naffe, n'aweebwa OMUGABO gw'okuweereza kuno,"*

Bikolwa 1:17. Matayo 10:1,

*"N'Ayita abayigirizwa Be ekkumi n'babiri n'Abawa obuyinza ku dayimooni embi, okuzigobanga n'okuwonya endwadde n'obunafu bwonna."*

Omwovo ogwo ogwali mu Yuda gwagendera ddala mu maaso okumalako obuweereza bwa Yesu. Olwo gyombi ne gituuka ku musaalaba. Yesu Yawanikibwa ku musaalaba, mu

ssanyu n'Awaayo Obulamu Bwe olw'aboonoonyi Omwoyo Gwe n'Aguwaayo eri Katonda. Omwoyo Gwe gwagenda eri Katonda ate ne gufukibwa mu kkanisa ku lunaku Iwa Pentekoote. Naye Yuda yeetuga omwoyo gwe ne guddayo eri setaani, naye nga Pentekoote ewedde omwoyo gwe gumu ogwo ogwali mu Yuda gwakomawo eri omuzabbibu ogw'obulimba ogukulira awamu n'ogw'amazima. Naye laba, omwoyo gwa Yuda tegwatuuka ku Pentekoote. Tegwagenda waggulu kufuna Mwoyo Mutukuvu. Gwali tegusobola. Naye omwoyo gwa Yuda ogwo gwakima ki? Gwakima nsawo ya zaabu. So nga gwayagala ssente. Era gukyayagala ssente. Bwe gugendera mu Linnya lya Yesu nga gukola ebintu eby'ekitalo n'enkonngaana gaggadde, gukyakola ssente, ebizimbe, eby'enjigiriza, na buli kintu nga gukikozesa ndowooza ya bintu biggwaawo. Tunuulira omwoyo ogwo ogubaliko oleme kusiruwazibwa. Yuda yagenda n'ekkumi n'ababiri era naye n'akola ebyamagero. Wabula TEYALINA Mwoyo wa Katonda ku bubwe. Yalina obuweereza. Teyatuuka ku Pentekoote okuva Iw'ataali nsigo ntuu. Teyali mwana wa Katonda mutuufu. Nedda ssebo. Era n'okutuusa kati bwe kiri mu kkunngaaniro lya Setaani. Tosiriwazibwa. Tolisiriwazibwa bw'oba ng'oli mulonde yennyini. Yesu Yagamba nti tolisiriwazibwa.

Ddala, abantu bano beeyita Bakulisitaayo naye si bo.

*"Nja kubaleeta basinzize wansi w'ebigere byo, era bamanye nti Nkwagadde."*

I Abakkolinso 6:2,

*"Temumanyi nti abatukuvu balisalira ensi omusango?"*

Tewalibeerawo batume bokka ekkumi n'ababiri ku nnamulondo ekkumi n'ebbiri nga balamula ebika bya Isiraeri ekkumi n'ebibiri, naye n'abatukuvu, baliramula ensi. Awo olwo banoabeeiyita aba Katonda nti era Katonda Abaagala Iwe balitegeerera ddala ani mwana wa Katonda era ani ayagalwa Omwana. Mazima, olunaku olwo lujja ebyo Iwe birtyolesebwa. Bano kaakano abafuga ensi mu kigera, era mu mulembe ogusembayo abalizimbira ensolo ekifaananyi mwe balifugira ensi, lumu balitoowazibwa Yesu bw'Alidda n'abatukuvu Be okulamulira ensi mu butuukirivu. Ky'ekyo kyennyini kye twalabye mu Matayo 25, abo "Bonna" abataali mu kuzuukira okw'olubereberye Iwe baliyimirira mu maaso g'Omulamuzi n'Omugole We.

### **Ekisuubizo N'okuwaanibwa**

Okubikkulirwa 3:10,

*"Kubanga weekuumma ekigambo eky'okugumiikiriza Kwange, era Nange Ndikukuuma obutayingira mu kiseera eky'okukemebwa, ekigenda okuja ku nsi zonna, okukema abo abatuula ku nsi."*

Kiki ky'Ategeeza ng'Agamba "ekigambo ky'okugumiikiriza Kwe?" Abaebbulaniya 6:13-15, "Kubanga Katonda bwe Yasuubiza Ibulayimu, bwe wataali gw'Ayinza kulayira amusinga obukulu, ne Yeerayira Yekka ng'Ayogera nti Mazima okuwa omukisa Nnaakuwanga omukisa n'okwaza Nnaakwazanga." Mulaba Omwoyo Ayogera ku Kigambo kya Katonda ekyatuweebwa. Okulindirira Ekigambo ekyo okutuukirira kyali kyetaagisa obugumiikiriza nga bwe gwali ku bya Ibulayimu. Yaguma ng'alinga amulaba Oyo Atabalika. Yagumiikiriza oluvannyuma ku nkomerero Ekigambo ne kituukirira. Eno y'engeri Katonda gy'Ayigirizaamu abantu Be obugumiikiriza Lwaki, singa Atuukiriza Ekigambo Kye ng'Akyolesezaawo mangu ago nga waakasaba, tewandiyize bugumiikiriza, era n'obulamu wandibwetamiddwa. Ka nnyongere okubalaga amazima gano nga bwe gaafuluma.

Abaebbulaniya 11:17,

*"Olw'okukkiriza Ibulayimu, bwe yagezesebwa yawaayo Isaaka era oyo eyali afunye ebisuubizo (Ekigambo kya Katonda) yawaayo omwana we yekka gwe yazaala."*

Ky'ekyo: Ibulayimu yagezesebwa NG'AMAZE kufuna Kigambo ekyasuubizibwa. Abasinga balowooza nti mangu ddala nga twakasaba mu Linnya lya Yesu ku bisuubizo bya Katonda ebirungi nti okugezesebwa si kwa kubeerawo. Naye wano kigamba nti Ibulayimu yagezesebwa ng'amaze kufuna kisuubizo.

Ekyo ddala kituufu, okusinziira ku muwandiisi wa Zabbuli ng'ayogera ku Yusufu, 105:19,

*"Okutuusa ekigambo kye Iwe kyajja: Ekigambo kya Mukama kyamugezesza."*

Katonda Atuwa ebisuubizo eby'omuwendo eby'ekitalo. Atusuubizza okubitukiriza. Ajja kukikola. Naye ekiseera okuva Iwe tusaba okutuusa we tuddibwamu tuteekwa okuyiga

okufuna obugumiikiriza mu mmeeme zaffe kubanga mu bugumiikiriza mwokka mwe tubeerera n'obulamu. Katonda Atuyambe tuyige essomo lino nga bwe tumanyi abantu b'omulembe guno ogwomukaaga nti baayiga obugumiikiriza. Twasoma ebyafaayo by'obulamu bw'Abakulisitaayo bano ab'ekitalo; So enjawulo nga nnene gye tulaba wakati w'obulamu bwabwe n'obwaffe kubanga baali bagumiikiriza nnyo era nga basirifu, naye leero tuwangulwa obutagumiikiriza n'okupakuka.

Agenda mu maaso n'okubagamba; "Kubanga ogenze mu maaso n'Ekigambo n'okitambuliramu n'ofuuka omugumiikiriza, Nja kukujja mu ssaawa y'okukemebwa ejja okujja mu nsi okubagezesu abo abali mu nsi." Kati nate era tulaba okugombagana kw'emirembe ebiri; kubanga ekisuubizo kino kikwataganako ku kiseera ky'Abaamawanga ekituuka ku ntikko mu kibonyoobonyo Eky'ekitalo.

"Nja kukukuuma oleme kuba mu ssaawa ey'okukemebwa, ey'okujja ku nsi, okubagezesu abo abali ku nsi." Olunyiriri luno si kirangiriro nti ekkanisa entuufu ya kuyita mu kibonyoobonyo. Singa ekyo kye Iwali lutegeeza bwe lutyo bwe Iwandigambye. Wabula Iwagamba, "Nja kukukuuma oleme kuba mu ssaawa ey'okukemebwa." Okukemebwa kuno kufaaniranira ddala ng'okwali mu lusuku Adeni. Kijja kuba kirowoozo ekiwakanya obutereevu Ekigambo kya Katonda ekyalagirwa, ate nga bw'okitunuulira mu buntu kijja kuba kituufu nnyo, nga kitangaaliza ddala, era nga kiwa obulamu kisiriwaze ensi.

Abalonde bennyini be bokka abatajja kusiriwazibwa. Elikemo kya kujja bwe kiti. Enkola egenderera okugatta amadiini gonna mu nsi (ecumenical move) etandise mu ngeri erabika nti nnungi era ya mukisa (okutuukiriza essaala ya Kristo nti ffenna tubeere omu) efuuke ya maanyi nnyo mu by'obufuzi ewalirize ne gavumenti ebeecko ky'ekola abantu bamwegattekko butereevu oba nga bayita mu kugondera enkola ye eyabagibwa mu tteeka kale waleme kubaawo bantu batongozebwaa ng'amakanisa amatuufu, okuggyako nga bafugibwa akakiiko kano butereevu oba mu ngeri endala. Obubiina obutono bugenda kufiirwa obwogerero, emikisa n'ebirala, okutuusa Iwe balifiirwa ebintu byonna ebikozesebwaa nga kw'otadde n'eddembe mu mwoyo lye balina n'abantu.

Eky'okulabirako, mu kiseera kino okuggyako ng'ekibiina ky'abaweereza (ababuulizi) ab'omu kitundu mu bifo bingi, si nakindi mu bibuga bingi, nga bamaze kusemba mutu, omuntu tasobola kupangisa kizimbe kukoleramu mikolo gya ddiini. Okubeera omuweereza w'eddiini mu baselikale, mu malwaliro n'ebifo ebirala, kati kumpi kya tteeka okutongozebwaa nti okkirizibwa ebibiina (ecumenical) ebya tirinita. Ng'okunyigirizibwa kuno bwe kweyongera, era kujja kugenda mu maaso, kijja kuberra kizibu okuwakana, kubanga okuwakana kwe kufiirwa emikisa. Era bangi nnyo bajja kukemebwa okweyongera mu maaso, kubanga bajja kuwlira nga okuweerereza Katonda mu lujjudde mu nkola y'ekibiina kino kisingako obutamuweerereza ddala mu lujjudde. Naye basobya. Okukiriza obulimba bwa setaani kwe kuweereza Setaani, newankubadde wandyagadde omuyite Yakuwa. Naye abalonde Be si ba kulimbibwa.

Ate ekirala, abalonde si ba kukuumbwa kyokka, wabula ng'enkola eno bw'efuuka "EKIFAANANYI EKIZIMBIDDWA ERI ENSOLO," abatukuvu baliba batwaliddwa mu kukwakkulibwa. Era enkola eno ey'essanyu esikiriza, eyatandikira mu lukunngaana mu Efeso egenda kufuuka ogusolo gwa setaani ogwonoona ne gulimalimbwa ensi yonna. Kubanga enkola y'Abakatoliki b'e Rooma n'Abapulotesitante mu kwegatta bajja kufuga obugagga bwonna obw'ensi bawalirize ensi yonna egwe mu mutego gwabwe ogw'eddiini, oba si ekyo bajja kubatta, nga babaggyako omukisa gw'okugula n'okutunda mwe banditambilizza obulamu bwabwe. Kino kijja kuba kyangu okutuukiriza kubanga bawala b'omwenzi bona bamaze okuddayo ewa nnyaabwe. Mu kiseera ekyo, Rooma efunye kumpi ensibuko zonna eza zaabu. Abayudaaya bajja kutegebwaa ekitimba beegatte, n'ekkanisa omwenzi ewambe ensi yonna egifuge.

### **Ekisuubizo Eri Omuwanguzi**

Okubikkulirwa 3:11-12,

"*Nzija mangu: nyweza ky'olina, omuntu yenna aleme okutwala engule yo.*

*Awangula Ndimufuula empagi mu yeekaalu ya Katonda Wange, so talifuluma nate bweru: Nange Ndiwandiika ku ye erinnya lya Katonda Wange, n'Erinnya ly'ekibuga kya Katonda Wange, Yerusaalemi ekiggya, ekikka okuva mu ggulu eri Katonda Wange, n'Erinnya Lyange eriggya.*"

Tekitwetaagisa kubaako bye twogera ku kiroowozo nti Ajja mangu. Tumanyi nti Ajja

kubanga tuli mu nnaku ez'oluvannyuma. Si bwe kiri? Naye Agenda mu maaso ng'Agamba "Nyweza ky'olina omuntu aleme kutwala ngule yo."

Wakati mu kiseera eky'ekibonyoobonyo eky'ekitalo Yesu w'Ajjira. Era mu kujja Kwe waliwo okuzuukira. Bangi ab'okuva mu nfuufu basituke n'abo abalibeera abalamu abalindiridde okuzuukira Kwe. Era bano baliweebwa engule. Lwaki? Lwa kuba Baana ba Katonda. Bakabaka abali awamu naye. Bafuga naye. Ago ge makulu g'akabonero k'engule — nga bafuga ne Kabaka Omukulu, Yennyini. Ekyo kye kisuubizo eri abo bona ababonaabona naye wano ku nsi abo bona abagumiikiriza mu kunyigibwa nga bamanyi nti Katonda, Omulamuzi Omwenkanya Alibawa empeera. Aboabeeffiriza byonna ku lulwe era ne bamuwa ebyabwe byonna balituula mu Nnamulondo Ye bagabane ku bwakabaka Bwe obw'ekitiibwa.

Oh, ekigambo kino kitukwatako ffenna ekiseera kino. Kiri nti nyweza — fuba. Tokoowa. Yambala eky'okulwanyisa kya Katonda kyonna — kozesa buli kyakulwanyisa ky'Atuwadde — kozesa buli kirabo kye tuli nakyo otunule mu maaso n'essanyu kubanga tugenda kutikkirwa engule n'Oyo Kabaka wa Bakabaka era Mukama wa Bakama.

Kaakano tatuwa buwi ngule naye Atugamba nti bano mu mugole balifuulibwa mpagi mu yeekaalu ya Katonda. Naye yeekaalu ya Katonda kye ki? Yesu Yayogera ku mubiri Gwe okuba yeekaalu. Bwe kityo bwe kyali. Yali yeekaalu ya Katonda. Naye kati tuli mubiri Gwe, ekkanisa entuufu ye yeekaalu ya Katonda okuyita mu Mwoyo Mutukuvu Ali mu ffe. Kati omuwanguzi agenda kumufuula mpagi mu yeekaalu eyo. Empagi kye ki? Empagi ddala kitundu ku musingi kubanga ewanirira enkola yonna. Yeebazibwe Katonda, Ateeka omuwanguzi awamu n'abatume ne bannabbi kubanga kigamba mu Abafeeso 2: 19-22,

*"Kale bwe mutyo temukyali bannaggwanga na bayise naye muli ba kika n'abatukuvu, era ba mu nnyumba ya Katonda;*

*kubanga mwazimbibwa ku musingi be batume ne bannabbi, Kristo Yesu Yennyini bw'Ali ejjina eddene ery'oku nsonda;*

*Mu Oyo buli nnyumba yonna, bw'egattibwa obulungi, ekula okubeeranga yeekaalu entukuvu mu Mukama waffe; Mu Oyo era nammwe muzimbibwa wamu okubeeraanga ekisibo kya Katonda mu Mwoyo."*

Ddala, olunyiriri olwo olw'abiri mu ebbiri lugamba nti twazimbibwa wamu nabo. Ebintu byonna byayita mu MULYANGO (Yesu) era litundu ku mubiri ogwo oba ekkanisa. Kati Katonda bw'Ateeka omuntu mu Yeekaalu ng'empagi n'Amufuula ekitundu ku kibiina ky'omusingi ogwo Aba ki? Aba Amuwa kubikkulirwa kw'Ekigambo ekimukwatako Ye (Katonda) kubanga ekyo kyennyini abatume kye baalina. Matayo 16:17. Bw'atyo bw'ali mu Kigambo ekyo. Ayimiridde awo. Tewali asobola kumuggyawo.

Lowooza nnyo ku Kigambo ekyo, "awangula." Yokaana abuuza ekibuuzo, "Ani oyo awangula?" era eky'okuddamu kikomerawo ddala "Oyo akkiriza nti Yesu ye Kristo." Tagamba nti omuwanguzi y'akkiririza mu 'MUNTU' ayitibwa Yesu era mu 'MUNTU' Ayitibwa Kristo wabula akkiriza nti Yesu YE KRISTO — omuntu OMU — si babiri. Y'oyo abatiziddwa mu Linnya lya Mukama Yesu Kristo.

Wano Katonda Ayogera ku mugole. Mwagala mulabe ekifaananyi kye ekirala? Kiri mu Okubikkulirwa 7:4-17,

*"Ne mpulira omuwendo gwabwe abaatekebwako akabonero, baali kasiriivu mu obukumi buna mu enkumi nnya abaatekebwako akabonero mu buli kika ky'abaana ba Isiraeri. Ab'omu kika kya Yuda abaatekebwako akabonero kakumi mu enkumi bbiri:*

*Ab'omu kika kya Lewubeeni kakumi mu enkumi bbiri: Ab'omu kika kya Gaadi kakumi mu enkumi bbiri;*

*Ab'omu kika kya Aseri kakumi mu enkumi bbiri; Ab'omu kika kya Nafutaali kakumi mu enkumi bbiri; Ab'omu kika kya Manaase kakumi mu enkumi bbiri;*

*Ab'omu kika kya Simyonikakumi mu enkumi bbiri; Ab'omu kika kya Leevi kakumi mu enkumi bbiri; Ab'omu kika kya Isakaali kakumi mu enkumi bbiri;*

*Ab'omu kika kya Zebbulooni kakumi mu erukumi bbiri; Ab'omu kika kya Yusufu kakumi mu enkumi bbiri; Ab'omu kika kya Benyamini abaatekebwako akabonero kakumi mu enkumi bbiri.*

*Oluvannyuma Iw'ebyo ne ndaba era laba ekibiina kinene omuntu yenna ky'atayinza kubala, mu buli ggwanga n'ebika n'abantu n'ennimi, nga bayimiridde mu maaso g'Omwana gw'Endiga, nga bambadde ebyambalo ebyeru, n'amatabi g'enkindu mu*

*mikono gyabwe.*

*Ne boogerera waggulu n'eddoboozi ddene, nga boogera nti Obulokozi buba bwa Katonda waffe Atudde ku ntebe, n'eri Omwana gw'endiga.*

*Ne bamalayika bona baali bayimiridde nga beetoolodde entebe n'abakadde n'ebiramu ebina; ne bavunnama amaaso gaabwe mu maaso g'entebe, ne basinza Katonda.*

*Nga boogera nti Amiina: omukisa n'ekitiibwa n'amagezi n'okwebaza n'ettendo n'obuyinza n'amaanyi bibe nga eri Katonda waffe emirembe n'emirembe Amiina.*

*Om uku bakadde n'addamu, ng'anngamba nti Bano abambadde ebyambalo ebyo ebyeru, be baani era bava wa?*

*Ne mmugamba nti Mukama wange, gw'omanyi. N'Anngamba nti bano be baava mu kubonaabona kuli okungi, ne bayoza ebyambalo byabwe, ne babitukuza mu musaayi gw'Omwana gw'Endiga.*

*Kye bavudde babeera mu maaso g'entebe ya Katonda; ne bamuweerezanga emisana n'ekiro mu yeekaalu Ye. N'oyo atudde ku ntebe alitimba eweema Ye ku bo.*

*Tebalirumwa njala nate, so tebalirumwa nnyonta nate, so omusana tegulibookya, newankubadde okwokya kwonna:*

*Kubanga Omwana gw'Endiga Ali wakati w'entebe y'Anaabalundanga, era Alibaleeta eri enzizi ez'amazzi ag'obulamu: era Katonda Alisangula buli zziga mu maaso gaabwe."*

Yesu Azze. Asibye n'envumbo 144,000. Yatwala 12,000 okuva mu buli kika. Naye waliwo ekibiina ekirala abatali mu 144,000 nga bano basangibwa mu nnyiriri 9-18. Be baani? Bano bali mu mugole abaggyibwa mu b'Amawanga. Bali mu maaso ga nnamulondo Ye emisana n'ekiro. Bamuweereza mu yeekaalu. Be balabirirwa Mukama mu ngeri ey'enjawulo. Mugole We.

Omugole alaga wonna Bba waali. Tagenda (omukazi) kulekebwa. Tagenda kuva ku luuyi Lwe. Aliba naye mu nnamulondo. Alitikkirwa engule n'ekitiibwa Kye.

Era Ndumuandiikako Erinnya lya Katonda Wange n'erinnya ly'ekibuga kya Katonda Wange. Era Erinnya lya Katonda y'Ani? Yali Katonda naffe, oba Emmanweri, naye eryo si ly'e liali erinnya Lye eryamuweebwa. "Olimutuuma Erinnya Lye Yesu." Yesu Yagamba "Najja mu Linnya lya Kitange ne mutansembeza." N'olw'ekyo Erinnya lya Katonda ye YESU, kubanga eryo ly'Erinnya mwe Yajjira. Ye MUKAMA YESU KRISTO. Era omukazi linnya ki ly'atwala ng'afumbiddwa? Atwala linnya lye (erya bba). Erinnya Lye lye liriweebwa omugole bw'Alimutwala gy'Ali.

Okubikkulirwa 21:1-4,

*"Ne ndaba eggulu eriggya n'ensi empya: kubanga eggulu ery'olubereberye n'ensi ey'olubereberye nga bigenze: n'ennyanja nga tekylawi.*

*Ne ndaba ekibuga ekitukuvu, Yerusaalemi ekiggya, nga kikka okuva mu ggulu ewa Katonda, nga kitegekeddwa ng'omugole ayonjereddwa bba.*

*Ne mpulira eddoboozi eddene eriva mu ntebe nga lyogera nti Laba, eweema ya Katonda awamu n'abantu, era Anaatuulanga wamu nabo, nabo banaabeeranga bantu Be, naye Katonda Yennyini Anaabeeranga wamu nabo, Katonda waabwe:*

*naye Alisangula buli zziga mu maaso gaabwe; era okufa tekulibaawo so tewaabengawo nate nnaku newankubadde okukaaba newankubadde okulumwa: eby'olubereberye nga biweddewo."*

Nga kya kitalo. Ebisuubizo bya Katonda byonna eby'ekitalo bituukiriziddwa. Byonna bigenda kuggwa. Enkyukakyuka eriba emaliriziddwa. Omwana gw'Endiga n'omugole We bona nga bateredde tebalina kibabulako. Okukinnyonnyola? Ani asobola okukikola ekyo? Tewali n'omu. Kirowoozeeko. Okukirootako? Soma olabe Ekigambo bwe kikyogerako. Yee tusobola okukola ebyo byonna, naye ate tukimanyaako akatundu katono okutuusa lwe kifuuka ekya nnamaddala mu kuzuukira okusooka.

*"Era ndimuandiikako Erinnya Lyange ERIGGYA."*

Erinnya lyange Erieggya. BYONNA bwe birifuuka ebiggya, Alimuteekako Erinnya era Erinnya eryo nalyo liriba Linnya lya mugole. Erinnya eryo oba Linnya ki tewali ayinza kufumiitiriza n'alimanya. Ku nkomerero kirina okutegerekeka oluvannyuma nti kubadde kubikkulirwa kwa Mwoyo Mutukuvu kale waleme kubaawo akisambajja. Naye tewali kubuusabuusa okubikkulirwa okwo Ajja kukuleka okutuusa olunaku Iw'Alyagala afulumye Erinnya eryo. Kimanyibwe nti kiriba kya kyewuunyo mu ngeri gye tutayinza kufumiitiriza.

### **OKULABULA OKUSEMBAYO ERI OMULEMBE**

Okubikkulirwa. 3:13,

*"Oyo alina okutu, awulire Omwoyo ky'Agamba eri amakanisa."*

Buli mulembe gukomekkerezebwa n'okulabula kwe kumu kuno. Gwe mulanga ogukubibwa enfunda n'enfunda nti amakansia gawulirize eddoboobi iya Mukama. Mu mulembe guno omulanga gwa mwanguka okusingako mu mirembe egypt' emabeega, kubanga okudda kwa Mukama kuseembedde. Obo oli awo abamu bandyebuuza "bwe waba nga waliyo omulembe omulala, ate olwo okupakuka kwaki?" Eky'okuddamu kiri wano. Omulembe ogusembayo, gujja kuba mumpi — omulimu ogw'oku ntikko (ogusembayo) ogw'okutwala ekiseera ekimpi. Ate si kino kyokka, naye omuntu ateeekwa okujjukira olubeerera nti mu maaso ga Katonda ebiseera byanguwa nnyo ddala; yee, emyaka olukumi lwe lunaku lumu. Kale bw'Aba Ajja mu ssaawa ntono Ye nga bw'Abiraba ebiseera, olwo ddala Ateeekwa okutulabula mu bwangu ennyo era eddoboobi Lye liteekwa okugenda mu maaso okuvuga mu mitima gyaffe twetegekere okuja okwo.

Oh, waliwo amaloboozi mangi mu nsi — emitawaana n'obwetaavu obusaanidde okufiibwako; naye tewalibaawo ddoboozi kkulu eritasaana kbuusibwa maaso ng'eddoboobi ly'Omwoyo. Kale "Oyo alina okutu okw'okuwulira, leka awulire Omwoyo ky'Ayogera eri amakanisa."



[www.messagehub.info](http://www.messagehub.info)

Sermons By  
**William Marrion Branham**  
*"... in the days of the voice ..." Rev. 10:7*